


BRČKO DISTRIKT  
BOSNE I HERCEGOVINE  
V L A D A



БРЧКО ДИСТРИКТ  
БОСНЕ И ХЕРЦЕГОВИНЕ  
В Л А Д А

# ИНФО

Октобар / Студени / Децембар, 2021. год.



# Upriličen prijem djece u Gradskoj vijećnici povodom Međunarodne sedmice djeteta





Povodom Međunarodne sedmice djeteta gradonačelnik Brčko distrikta Bosne i Hercegovine Esed Kadrić zajedno sa šefom Odjeljenja za obrazovanje Zoranom Bulatovićem i šeficom Pododjeljenja za predškolsko i osnovno obrazovanje Marom Matkic upriličio je prijem za učenike osnovnih škola s područja Distrikta te djecu iz brčanskog obdaništa „Naša djeca“.

Prisutna djeca su pozdravila gradonačelnika, zatim su se predstavili te iskoristili priliku da pokažu svoje znanje o pravima djeteta. Ujedno, postavljali su njima zanimljiva pitanja, uputili pohvale, iskazali svoje želje za budućnost te izrecitovali prigodne pjesmice.

„Djeca su se vrlo dobro pripremila za ovaj susret i drago mi je da su, bez imalo oklijevanja, postavljali pitanja i izrekli svoje želje. Oni su naša budućnost i budućnost ovog grada“, kazao je Kadrić.

Nakon razgovora gradonačelnik je zajedno s djecom obišao prostorije Gradske vijećnice, jedne od prepoznatljivih građevina i simbola grada.

Međunarodna sedmica djeteta se tradicionalno obilježava svake godine u prvoj punoj sedmici oktobra, a za cilj ima naglašavanje prava i potreba djeteta, kao i položaj djeteta u zajednici u kojoj živi, raste i razvija se.





# Veleposlanik Švicarske drugi put posjetio Distrikt

Gradonačelnik Brčko distrikta BiH Esed Kadrić zajedno sa dogradonačelnikom Antom Domićem, predsjednikom Skupštine Sinišom Milićem i dopredsjednikom Skupštine Ivom Filipovićem, održao je sastanak s veleposlanikom Švicarske u Bosni i Hercegovini, Nj. E. Danielom Hunnom i prvim zamjenikom Visokog predstavnika i supervizorom za Brčko gosp. Michaelom Scanlanom na kojem su razgovarali o aktualnoj situaciji u Distriktu na političkom i ekonomskom planu.

Gradonačelnik se zahvalio Veleposlanstvu Švicarske u BiH na podršci, istakavši njen značaj u svezi s implementacijom zajedničkih projekata. „Potvrdili smo naše zajedničko opredjeljenje da se u naredne tri godine okonča proces deminiranja na području Distrikta Brčko, a što je izvjesno zahvaljujući pomoći švicarske Vlade, odnosno veleposlanika u BiH“, kazao je Kadrić.

Na sastanku se razgovaralo o realizaciji velikih kapitalnih, infrastrukturnih projekata, kao i angažmanu rukovodstva lokalne zajednice u provođenju reformi javne uprave, borbe protiv korupcije i stvaranja odgovarajućeg okvira za ekonomski i gospodarski razvitak u Brčko distriktu.

„Razgovarali smo o mogućnostima proširivanja suradnje i moram reći kako sam zaista impresioniran posvećenošću koju rukovodstvo ovog grada i njegov Gradonačelnik imaju u stvaranju infrastrukturnih i zakonskih pretpostavki za bolji ekonomski razvitak regije i u tom smislu mi ćemo sigurno potencijalnim investitorima iz Švicarske preporučiti Brčko distrikt za potencijalne investicije i suradnju“, istakao je veleposlanik Hunn.

Prva posjeta veleposlanika Švicarske Nj. E. Daniela Hunna upriličena je u veljači ove godine, a za veleposlanika je imenovan u listopadu 2020. godine.

# Усвојена Одлука о оснивању Радио-новинске и издавачке установе Радио Брчко

Влада Брчко дистрикта Босне и Херцеговине на 12. ванредној сједници усвојила је приједлог Одлуке о оснивању Радио-новинске и издавачке установе Радио Брчко Брчко дистрикт БиХ.

Усвајањем ове одлуке приступљено је промјени статуса Јавног предузећа Радио Брчко у статус установе, чиме РНУ Радио Брчко постаје правно лице које оснива Брчко дистрикт, а промјена статуса предвиђена је од 1. новембра 2021. године брисањем јавног предузећа и регистрацијом

установе у Регистар Основног суда Брчко дистрикта БиХ.

Промјеном статуса обезбјеђује се нормално финансирање и функционисање за Радио-новинску и издавачку установу Радио Брчко те ће ова установа водити рачуна о дјелатностима које је имала у ранијем статусу и проширити дјелатности које се односе, између осталог, на штампање новина, издавање новина, часописа и књига те емитовање радијског и телевизијског програма.



# „Priateljstvo bez granica“ između Distrikta i Vinkovaca

Gradonačelnik Brčko distrikta Bosne i Hercegovine Esed Kadrić posjetio je, zajedno sa dogradonačelnikom Antom Domićem, glavnim koordinatorom Vlade Željkom Antićem i suradnicima iz Vlade Brčko distrikta BiH, gradsku upravu u Vinkovcima gdje je održan radni sastanak sa gradonačelnikom Vinkovaca Ivanom Bosančićem, njegovim zamjenikom i suradnicima.

Predstavnici Vlade Brčko distrikta BiH su na ovom susretu imali priliku da se upoznaju sa izazovima koji se pojavljuju u procesu pridruživanja Europskoj uniji te implementacijom projekata financiranih od EU.

„Mi smo početnici u tom poslu i iskustvo koje ima gradska uprava u Vinkovcima i Razvojna agencija bit će od velike koristi za Brčko distrikt BiH. Mi ćemo ovu suradnju institucionalizirati i stvoriti preduvjete da

dođe do zajedničkog djelovanja na mnogim drugim projektima i u drugim oblastima, tako da je ovo početak jedne dobre dugoročne suradnje koja će biti od koristi za građane koji žive i u Vinkovcima i u Brčko distriktu BiH“, kazao je Kadrić.

Na radnom sastanku dogovorena je zajednička suradnja kroz europski projekt nazvan „Priateljstvo bez granica“, a tiče se financiranja uređenja dijela vrtića jaslica u Brčko distriktu BiH čime je učinjen prvi korak za buduću intenzivnu suradnju između Distrikta i grada Vinkovci.

„Krenuli smo sa jednim lijepim europskim projektom i ubuduće će biti još više projekata pa i jedan memorandum o suradnji kroz koji očekujemo da se naši građani povežu, da učinimo lijepe i konkretne stvari i sa jedne i sa druge strane granice“, izjavio je Bosančić.



# Gradonačelnik Distrikta Esed Kadrić posjetio Dnevni centar za djecu

Gradonačelnik Brčko distrikta Bosne i Hercegovine Esed Kadrić zajedno sa šeficom Ureda za upravljanje javnom imovinom Brčko distrikta Dijanom Pajić, posjetio je Dnevni centar za djecu u naselju Brod, koji djeluje u organizaciji Omladinskog centra „Vermont“ i Udruženja građana „Romi na djelu“ uz podršku međunarodnih organizacija i Vlade Brčko distrikta BiH.

Gradonačelnik Kadrić se upoznao sa radom i aktivnostima centra koji broji preko 240 korisnika - djece romske nacionalnosti, te je posebno istakao zadovoljstvo činjenicom da sva djeca koja borave u centru redovno pohađaju nastavu u školama na području Distrikta. „Drago mi je da je učinjen pozitivan pomak, da

idete u školu jer imate pravo na školovanje i mi ćemo učiniti sve da ostvarite svoja prava. Motivisat ćemo vaše roditelje i okruženje, da vam bude pružena podrška u školovanju i pohađanju nastave. Kao pozitivan primjer mogu spomenuti i naselje Prutače, gdje imamo povećan broj djece romske nacionalnosti u školama“, kazao je K a d r i ć . Djeca su iskoristila priliku da postave njima zanimljiva pitanja, kao i da iskažu svoje ideje vezano za adaptaciju Centra u narednom periodu, te su istaknuli želju za izgradnjom sportskog igrališta u krugu istog. „Mi podržavamo rad vašeg Centra, trudimo se da on funkcioniše, te ćemo se uključivati u njegove aktivnosti i nadam se da će biti još ovakvih centara“ dodao je gradonačelnik.



# Gradonačelnik Distrikta sa članovima Vlade obišao mjesto tragedije

Gradonačelnik Brčko distrikta Bosne i Hercegovine Esed Kadrić posjetio je zajedno sa članovima Vlade brčansko naselje Suljagića Sokak, gdje se u jutarnjim satima dogodio požar u kome je šest stanovnika Distrikta tragično izgubilo život dok se ostali povrijeđeni nalaze na bolničkom liječenju, a jedno je prevezeno na Univerzitetski klinički centar Tuzla zbog teških tjelesnih povreda.

Gradonačelnik Kadrić je u razgovoru sa predstavnicima Policije Brčko distrikta BiH, Odjeljenja za zdravstvo i ostale usluge, Pododjeljenja za socijalnu zaštitu, Odjeljenja za izbjeglice i raseljena lica kao i sa predstavnicima Crvenog krsta Brčko distrikta BiH tražio hitno zbrinjavanje preživjelih članova porodice, te su odmah preduzete aktivnosti za njihov privremeni smještaj.

„Ovo je tragedija kakvu ne pamtimo u Distriktu. Došli smo da se postaramo o povrijeđenima. Vlada Distrikta će žurno donijeti odluke o zbrinjavanju preživjelih i obnovi stambenog objekta. Svi građani Distrikta suosjećaju sa ovom porodicom, jako smo potreseni i osjećamo veliku tugu i bol“ kazao je Kadrić.

Među povrijeđenima ima i djece sa kojima se gradonačelnik susreo tokom obilaska Dnevnog centra koji pruža stručnu podršku djeci romske populacije. „Jučer sam posjetio ove mališane, razgovarao s njima nesluteći da će neki od njih tokom noći proći strašnu tragediju izazvanu požarom“ rekao je Kadrić.



# Отворена будућа сарадња између Дистрикта и Републике Индонезије

Градоначелник Брчко дистрикта Босне и Херцеговине Есед Кадрић заједно са главним координатором Жељком Антићем, шефом Одјељења за привредни развој, спорт и културу Пером Гудељевићем и шефом Кабинета градоначелника Мујом Хацићем, одржао је састанак са амбасадором Индонезије у Босни и Херцеговини, Њ.Е. Роем Коном и његовим сарадницима, на којем су разговарали о потенцијалној економској сарадњи између Дистрикта и Републике Индонезије.

Присутни чланови Владе су имали прилику да се упознају са уставном структуром Индонезије, њеном економском и политичком организацијом, те се разговарало о будућој сарадњи на пољу привредног развоја између Брчко дистрикта БиХ и Републике

Индонезије.

Отворили смо разговоре о могућој сарадњи у виду улагања инвеститора из Индонезије у привредни потенцијал Дистрикта и договорили смо увезивање Привредне коморе Брчко дистрикта БиХ са индонезијским привредницима, казао је Кадрић.

Амбасадор Коно је, између осталог, и с к а з а о и н т е р е с о в а њ е з а инфраструктурне пројекте који се раде на подручју Дистрикта те је понудио техничку помоћ њихових инжењера, нарочито по питању изградње аутоцеста. На састанку се такођер разговарало о могућности да се Брчко дистрикт Босне и Херцеговине и један град у Републици Индонезији побратиме, на чему ће се и радити у будућем периоду.

## Gradonačelnik na sastanku s UNDP-jem o realizaciji projekata utopljavanja javnih objekata

Gradonačelnik Brčko distrikta Bosne i Hercegovine Esed Kadrić zajedno sa svojim saradnicima u zgradi Vijećnice održao je sastanak sa zamjenikom rezidentne predstavnice UNDP-ja u BiH Stephen Kinloch Pichat i njegovim saradnicima na temu realizacije projekata utopljavanja javnih objekata na području Distrikta.

Gradonačelnik je naglasio da bi ova investicija bila dugoročno od velike koristi za Distrikt u smislu, kako je kazao, uštede na energiji.

„Vlada Distrikta je u prethodnoj godini počela jedan izvanredan projekat s UNDP-jem u BiH s opcijom da se ide u utopljavanje javnih objekata i skele su već postavljene na Gradskoj bolnici i na Domu zdravlja. Mi smo investirali 500.000,00 KM, udružena sredstva s UNDP-jem i projekat ide dobro. S obzirom da imamo dobro pozitivno iskustvo uložili smo dodatnih milion konvertibilnih maraka u budžetu za 2021. godinu i u fazi smo finalnih usaglašavanja i idemo u postupak utopljavanja zgrade Vlade, stare zgrade Policije, Doma kulture, odnosno Skupštine i eventualno i objekta gdje je smještena Direkcija za

finansije. Ova investicija bila bi dugoročno od velike koristi za Distrikt u smislu uštede na energiji, odnosno na novcima koje angažujemo za zagrijavanje tih objekata tokom jedne godine“, kazao je Kadrić dodajući da je uvjeren da će se saradnja nastaviti i na realizaciji sličnih projekata u drugim oblastima.

Zamjenik rezidentne predstavnice UNDP-ja u BiH Stephen Kinloch Pichat, također, kazao je da je jedan od glavnih benefita energetske efikasnosti ušteda.

„Jedan od važnih elemenata programa jeste upravo održivo upravljanje energijom vezano za klimatske promjene i on je od ključne važnosti zbog smanjenja emisija Co2, a samim tim se odnosi i na donošenje konkretnih promjena u životima svih ljudi koji žive u Distriktu. Isto tako umanjeње Co2 je jedan doprinos koji BiH treba dati u smislu nacionalnog smanjenja kojeg podržavamo i sada je to upravo aktuelna tema. Kada je u pitanju Distrikt već postoje konkretni primjeri ove naše saradnje, a također razmatramo kako možemo dalje da nastavimo i da proširimo saradnju van ovoga što već sada radimo“, kazao je Pichat.



# Distrikt se pridružio projektu „Zeleni gradovi“

U Gradskoj vijećnici potpisan je Memorandum o razumijevanju po pitanju projekta Green City Action Plan, odnosno Akcioni plan Zeleni grad, između Vlade Brčko distrikta Bosne i Hercegovine i Evropske banke za obnovu i razvoj.

Potpisivanju je prethodio sastanak na kojem su bili prisutni gradonačelnik Brčko distrikta BiH Esed Kadrić, zamjenik gradonačelnika Anto Domić, šef Kabineta gradonačelnika Mujo Hadžić i direktorica Ureda Evropske banke za obnovu i razvoj u BiH Manuela Naessl, ambasador Italije u BiH Nj. e. Marco Di Ruzza i supervizor za Brčko distrikt BiH Michael Scanlan.

Gradonačelnik Brčko distrikta Bosne i Hercegovine Esed Kadrić je, nakon potpisivanja, kazao da se ovim memorandumom Distrikt obavezuje na izradu akcionog plana Zeleni grad, odnosno identifikaciji investicijskih projekata iz djelokruga zelenih gradova.

„Prvi projekat smo započeli, to je izgradnja glavnog transportnog cjevovoda oko grada Brčko, putem brčanske obilaznice, u vrijednosti od 6,5 miliona eura i očekujemo da ćemo do konca trećeg mjeseca naredne godine krenuti u konkretnu realizaciju ovog projekta“, istakao je Kadrić.

U svom obraćanju gradonačelnik je naveo da Vlada Distrikta nastavlja raditi na polju vodosnabdijevanja, pronalaska kvalitetnog projekta za rješavanje problema regulacije otpadnih voda, kao i digitalizaciji infrastrukture energetske efikasnosti javnih objekata, a angažovat će se i konsultant koji će biti od pomoći Brčko distriktu BiH u prepoznavanju važnih projekata koji bi se prioritarno realizovali za potrebe razvoja i kvalitetnijih uslova za život na području Distrikta.

Direktorica Ureda Evropske banke za obnovu i razvoj u Bosni i Hercegovini Manuela Naessl istakla je zadovoljstvo što se Brčko distrikt BiH pridružuje Evropskoj banci za obnovu i razvoj i projektu zelenih gradova.

„Brčko se pridružuje broju od 50 gradova u regiji koji su već preduzeli mjere i korake u uključivanju projektu zelenih gradova i mrežu zelenih evropskih gradova i Brčko je četvrti grad u Bosni i Hercegovini koji je stupio u ovu mrežu, što je čini zemljom koja je ekološki osviještena,

odnosno Zelenom zemljom. Sadašnja Vlada i sadašnji gradonačelnik pokazali su da su napravili korak naprijed u izgradnji zelenih gradova, zelenijeg i čistijeg grada, što će svim stanovnicima učiniti život boljim i kvalitetnijim“, kazala je direktorica Naessl.

Potpisivanju Memoranduma prisustvovao je i ambasador Italije u Bosni i Hercegovini Nj. e. Marco Di Ruzza, koji se zahvalio što je mogao svjedočiti ovom događaju i potvrdio da Italija pruža punu podršku Vladi Brčko distrikta BiH u preduzimanju koraka za razvoj i poboljšanje životne zajednice te će italijanski fond kroz CEI podržati izradu akcionog plana.



# Усвојен Закон о пчеларству, Влада одобрила донацију студентима генерације са подручја Дистрикта



Влада Брчко дистрикта Босне и Херцеговине је на 30. редовној сједници усвојила је Закон о пчеларству Брчко дистрикта БиХ с циљем заштите пчела и њене улоге у природи као и регулисања пчеларске дјелатности.

Шеф Одјељења за пољопривреду, шумарство и водопривреду Владе Брчко дистрикта БиХ Миленко Нинковић казао је да је доношење Закона започето још у претходној Влади.

Почетком ове године ми смо усвојили план усвајања закона за ову годину. Одјељење је имало у плану три закона и ово је први који је комплетно завршен и данас усвојен. До сада та област није била законски регулисана, није постојао ниједан правилник, нити је био ранији Закон о пчеларству. Приликом израде Закона укључили смо и сва три удружења пчелара која активно дјелују на територији Дистрикта и уважили неке њихове приједлоге. Приједлог закона које је предложило Одјељење доживио је само мању исправку у члану 4, а остало је све остало као што је било и у приједлогу који су сви грађани и удружења могли видјети на званичном сајту Владе, казао је Нинковић.

Према његовим ријечима након усвајања Владе, Закон о пчеларству иде у скупштинску процедуру и његово прво читање очекује се на наредној скупштинској сједници. Овим законом прописује се, поред осталог, држање и узгој пчела, начин и услови за постављање пчелињака, успостављање и вођење катастра пчелињих паша, здравствена заштита пчела, успостављање евиденције пчелара и пчелињака, област удруживања и организовања пчеларских организација и друга питања која су од значаја за област пчеларства на територији Брчко дистрикта БиХ.



# Distrikt na putu prema samoodrživosti kroz energetske sektor

U organizaciji USAID-a u Brčko distriktu BiH održana je konferencija pod temom „Organiziran i reguliran energetske sektor Brčko distrikta Bosne i Hercegovine Put prema samoodrživosti“ na kojoj su, između ostalih, nazočili predstavnici Vlade Brčko distrikta Bosne i Hercegovine, javnih poduzeća, državnih institucija, Gospodarske komore Brčko distrikta BiH te supervizor za Brčko distrikt BiH, gospodin Michael Scanlan.

U svom obraćanju, ravnateljica misije USAID BiH Courtney Chubb kazala je da zemlje širom svijeta rade na transformiranju svojih sustava, odnosno prelasku sa konvencionalnih, fosilnih goriva na obnovljive izvore energije, te kako je u Brčko distriktu BiH napravljen značajan napredak, naročito kada je riječ o prijedlogu Zakona o električnoj energiji.

„Nadam se kako će ovaj zakon biti ubrzo donesen i kako će Distrikt napredovati dalje, u vidu zakona o obnovljivim izvorima energije, o energetske učinkovitosti i plinu Provedbom zajedničkih preporuka koje se tiču pojednostavljenja postupaka izdavanja dozvola za izgradnju postrojenja za

proizvodnju energije iz obnovljivih izvora, Brčko distrikt BiH će privući brojne investicije. Želim pohvaliti lidere Brčko distrikta BiH i građane jer su primjer što je to što se može zajednički uraditi, koje se pozitivne promjene mogu napraviti i vjerujem kako će Distrikt postati model, ne samo za Bosnu i Hercegovinu, nego i za zemlje u regiji“, istakla je ravnateljica Chubb.

U svom obraćanju gradonačelnik Brčko distrikta BiH Esed Kadrić kazao je kako se Vlada Distrikta opredijelila za stvaranje zakonodavnog okvira za obnovljive izvore energije što je dobra pretpostavka za intenzivniji ekonomski razvoj Distrikta.

„Vrlo ozbiljno smo pristupili procesu izrade novog zakona o obnovljivim izvorima energije jer postoji velik interes poslovne zajednice i građana Distrikta za ovakvim propisom. Današnju konferenciju doživljavamo kao još jedan poticaj i podršku uložnim naporima kako bismo do polovine naredne godine imali usvojen zakon i krenuli u operativne aktivnosti odnosno razvijanje ovog dijela sektora“, istakao je Kadrić.





## Vlada nastavlja aktivnosti očuvanja i zaštite nacionalnih spomenika na području Distrikta

U Gradskoj vijećnici održan je radni sastanak između Komisije za očuvanje nacionalnih spomenika Bosne i Hercegovine i gradonačelnika Brčko distrikta Bosne i Hercegovine Eseda Kadrića te predstavnika Vlade Distrikta i Zavoda za planiranje, projektovanje i razvoj Brčko distrikta BiH, na kojem se govorilo o projektima restauracije, očuvanja i zaštite nacionalnih objekata na području Distrikta.

Kako je kazao gradonačelnik Kadrić, problem postoji u nepostojanju zakonodavnog okvira koji bi jasnije opredijelio ulaganja sredstava Vlade za zaštitu, konzervaciju i rekonstrukcije nacionalnih objekata, posebno u centralnoj gradskoj zoni, u dijelu Mjesne zajednice Srpska Varoš. Komisija je dala preporuke i zadatke te će Vlada preduzeti aktivnosti kako bi se u što kraćem periodu mogle

donijete odluke o statusu objekata koji imaju kulturno-historijsku vrijednost na području Brčko distrikta BiH.

„U ovom trenutku su u jako lošem stanju mnogi historijski značajni objekti našeg grada, kao što je Zadužbina Krsmanovića Turski konzulat, objekat prve pošte, Kočića kuća, i mi, kao Vlada, smo opredjeljenja da ih moramo dovesti do nivoa sređenosti kao što je Gradska vijećnica“, istakao je Kadrić.

Predsjedavajući Komisije za očuvanje nacionalnih spomenika Bosne i Hercegovine Faruk Kapidžić naglasio je da su brčanski nacionalni objekti od izuzetne važnosti i da će Komisija organizovati svoj interni rad s Vladom Distrikta kako bi se otkočili neophodni procesi za zaštitu ovih objekata.

# Vlada priprema alternativni smještaj za porodicu Salihović

Gradonačelnik Brčko distrikta BiH Esed Kadrić posjetio je preživjele članove porodice Salihović, čijih je sedam srodstvenika stradalo 23. oktobra u požaru koji je zahvatio porodičnu kuću u brčanskom naselju Suljagić sokak.

Članovima porodice Salihović brzmom reakcijom gradonačelnika Kadrića osiguran je privremeni smještaj u hotelu Evropa i pružena neophodna pomoć u obezbjeđenju normalnih uslova za život.

Ispunjavajući obećanje gradonačelnika Eseda Kadrića koje je dao prilikom posjete stradalim Salihovićima, nadležne institucije brčanske Vlade pripremaju

postupak izgradnje nove kuće.

Osim posjete porodici Salihović gradonačelnik Kadrić danas je obišao i naselje u Brci u kojem se priprema alternativni smještaj za Salihoviće, u kojem će boraviti dok se ne završi izgradnja nove kuće.

U pratnji gradonačelnika Brčko distrikta BiH bili su Ljubica Ilić, šefica Odjeljenja za raseljena lica, izbjeglice i stambena pitanja, Amir Softić, šef Pododjeljenja za raseljena lica, izbjeglice i stambena pitanja, Denis Šehanović, sekretar Crvenog krsta/križa Brčko distrikta BiH, te Nataša Stevanović, direktorica Centra za socijalni rad sa saradnicima.





## U Vijećnici otvorena izložba povodom obilježavanja 75. godišnjice izgradnje pruge Brčko-Banovići



Gradonačelnik Brčko distrikta Bosne i Hercegovine Esed Kadrić otvorio je sinoć u Gradskoj vijećnici izložbu Muzeja istočne Bosne iz Tuzle, pod nazivom „75 godina pruge Brčko-Banovići“.

Ova izložba je dio svečanih aktivnosti koje organizuje Savez antifašista i boraca Narodnooslobodilačkog rata Tuzlanskog kantona i Udruženje antifasista i boraca Narodnooslobodilačkog rata Banovići, a njenim izlaganjem u galeriji brčanske Vijećnice dali smo doprinos u njegovanju kulture sjećanja na ovaj veliki uspjeh prethodnih generacija koje su se vodile duhom zajedništva i solidarnosti.

Naime, prije 75 godina je završena izgradnja željezničke pruge Brčko-Banovići, a prvi voz natovaren ugljem krenuo je preko Brčkog u velike gradove čime je započeo intenzivan regionalni razvoj.

Gradonačelnik Kadrić obratio se prisutnima kazavši da je izgradnja pruge Brčko-Banovići osnažila privredu i Brčkog i Banovića, kao i cijele sjeveroistočne Bosne, te da je izgradnja pruge inspirativan događaj jer su mladi ljudi iz tog vremena bespoštedno pristupili radu za opće dobro, radu za razvoj svoje zajednice i zemlje što u današnjem kontekstu može biti afirmativan primjer za mlade generacije.

# Čelnici Vlade Distrikta s predstavnicom SIGMA/OECD razgovarali o reformi javne uprave

Čelnici Vlade Brčko distrikta Bosne i Hercegovine, gradonačelnik Brčko distrikta BiH Esed Kadrić, dogradonačelnik Anto Domić i glavni koordinator Željko Antić u brčanskoj Vijećnici održali su radni sastanak s predstavnicom Organizacije za ekonomsku suradnju i razvoj (OECD), gospođom Blancom Lazaro, stučnjakom za upravljanje javnim i ljudskim resursima pri zajedničkoj inicijativi OECD-a i Europske unije.

Ova inicijativa je financirana od strane EU-a pod nazivom SIGMA program koji služi za pružanje podrške zemljama partnerima u modernizaciji javne uprave. Gospođa Lazaro dio je petočlane delegacije OECD-a, Delegacije EU u BiH / EUSR i OHR.

Gradonačelnik i njegovi suradnici pružili su punu podršku procesu reforme javne uprave brčanske administracije koji je u tijeku. Naglasak je bio na funkcionalnom unaprijeđenju kroz stvaranje učinkovite javne uprave donošenjem novih zakona o javnoj upravi i državnoj službi koji su u što većoj

mjeri usuglašeni sa standardima Europske unije.

Svi sudionici sa sastanka zaključili su kako nova zakonska rješenja ne trebaju biti kozmetičke prirode nego bitne korjenite promjene, što bi značilo i konačno unaprijeđenje određenih statusnih odredaba i kroz samu izmjenu Statuta Brčko distrikta BiH.

Gradonačelnik i njegovi suradnici izrazili su punu podršku radnim skupinama za izradu gore pomenutih zakona koji su uložili značajan trud, a čiji su dosadašnji nacrti visoko ocjenjeni od strane gospođe Lazaro i njenih kolega.

Inače novim zakonskim rješenjima bile bi učinjene značajne promjene u pogledu odgovornosti u radu fondova, zavoda i javnih poduzeća kao i prenošenja zadataka na operativnu razinu. Utvrđeno je da je reforma javne uprave uključujući izradu nacrtu zakona, proširenje kapaciteta i izgradnju institucija, vođena odlučnom voljom vladajuće koalicije ka pristupanju Europskoj uniji.





## Амбасадор Републике Сјеверне Македоније у Босни и Херцеговини посјетио Брчко дистрикт БиХ

Градоначелник Брчко дистрикта Босне и Херцеговине Есед Кадрић примио је у првој службеној посјети амбасадора Републике Сјеверне Македоније у Босни и Херцеговини, Њ.Е. Екрема Ебибија и савјетника господина Редјепа Салиу. Током сусрета су разговарали о економској сарадњи и привредним могућностима које нуде Брчко дистрикт Босне и Херцеговине и Република Сјеверне Македоније.

Градоначелник Кадрић казао је да постоји посебна повезаност између Дистрикта и Македоније, а нарочито се памти чињеница да је прва спасилачка екипа за вријеме поплава у 2014. години дошла управо из ове државе. Представници брчанске Владе упозналису амбасадора са структуром градске управе, повољним географско-политичким положајем и потенцијалима Дистрикта.

Амбасадор Ебиби казао је да редовно прати све економске и политичке догађаје, како у ентитетима, тако и у Дистрикту, те да је рад и посвећеност брчанске Владе за велику похвалу, с обзиром да се ради о Влади која је кренула са радом прије непуну годину.

На састанку се разговарало о интензивирању привредне и трговинске сарадње, а усаглашено је да ће се у будућности спровести активности братимљења Брчко дистрикта БиХ са једним градом у Македонији, о чему се и разговарало са претходним владама, али није дошло до конкретизовања.

Осим градоначелника Кадрића, на састанку су били присутни замјеник градоначелника Анто Домић, главни координатор Владе Жељко Антић и шеф Кабинета градоначелника Мујо Хаџић.

# Usvojena Odluka o financiranju i sufinanciranju programa i projekata udruga građana iz područja športa, kulture i turizma

Vlada Brčko distrikta Bosne i Hercegovine usvojila je na sjednici Odluku o financiranju i sufinanciranju programa i projekata koja su udruge građana iz područja športa, kulture i turizma podnijeli Odjelu za gospodarski razvitak, šport i kulturu.

Kako je na konferenciji za medije kazao predstojnik Odjela Pero Gudeljević, ovom odlukom je pozicionirano 1.388.000,00 KM za programe i projekte koji su prošli evaluaciju povjerenstva, a radi se o ukupnom broju od 53 udruga iz područja športa i 35 udruga iz područja kulture i turizma.

Naglasio je kako će odmah nakon donošenja ove Odluke biti objavljen novi javni poziv na kojem će udruge, koja nisu prošla u prvom krugu, imati priliku ispraviti pogreške u svojim projektima, a o čemu će ih povjerenstvo obavijestiti.

Rebalansom proračuna je za šport izdvojeno 1.200.000,00 KM. Ova sredstva će biti raspoređena

temeljem posebne odluke Vlade, a tim sredstvima će se pokušati nadomjestiti sve ono što nije moglo biti predmet projekata i programa klubova iz različitih područja športa, kazao je Gudeljević.

„Gledat ćemo da sredstva dobiju oni koji ostvaruju najbolje rezultate u svojim rangovima natjecanja, a u tom dijelu ćemo financirati i one klubove koji se natječu u Europi, te ćemo posebnu pažnju posvetiti za prvoligaše. Ono što ćemo dodatno uraditi jeste da ćemo pobrojati sve manifestacije i događaje koji su od posebnog značaja za našu zajednicu i tradicionalno se održavaju u Brčko distriktu, jer će na taj način dodjela sredstava biti transparentna što je ujedno brži, lakši i jednostavniji put za odobravanje tih sredstava, te ćemo faktički pokazati brigu o onima koji na najbolji mogući način prezentiraju Brčko distrikt“ precizirao je Gudeljević.



## Imenovana interesorna radna grupa Distrikta u okviru ROMACTED II Programa

U prostorijama Gradske vijećnice Brčko distrikta Bosne i Hercegovine održan je prvi sastanak Institucionalne radne grupe u okviru ROMACTED II Programa, s ciljem poboljšanja lokalne demokratije, odgovornosti, inkluzivnosti i reagovanja prema romskim građanima u Distriktu.

Na sastanku je postignut dogovor oko narednih aktivnosti u periodu implementacije Romacted II Programa na području Distrikta te je imenovana interesorna radna grupa koju će činiti predstavnici Odjeljenja za raseljena lica, izbjeglice i stambena pitanja, Odjeljenja za obrazovanje, Odjeljenja za zdravstvo, Odjeljenja za privredni razvoj, sport i kulturu, Javne zdravstvene ustanove, Policije Distrikta te Zavoda za zapošljavanje.

Ova radna grupa će raditi na implementaciji ROMACTED II Programa radi jačanja kapaciteta institucija s ciljem unapređenja položaja romske populacije.

ROMACTED II Program je program Evropske unije i Vijeća Evrope koja se osim u Brčko distriktu BiH, implementira na području još 11 gradova/općina u BiH: Bijeljine, Gradiške, Doboja, Donjeg Vakufa, Kaknja, Kalesije, Prnjavora, Tuzle, Visokog, Vukosavlja i Travnika.



## Gradonačelnik ugostio članove Univerzalne škole sporta „SPORTISSIMO“

Gradonačelnik Kadrić u Gradskoj vijećnici upriličio je prijem za članove Univerzalne škole sporta „Sportissimo“ povodom dosadašnjih zapaženih ostvarenih rezultata.

Kadrić je čestitao članovima i kolektivu na ostvarenim rezultatima i ukazao podršku i zahvalnost na promoviranju univerzalnih vrijednosti kao što je sport i značaj sporta u našoj lokalnoj zajednici.

Milomir Mandić, predsjednik škole „Sportissimo“, upoznao je gradonačelnika s budućim aktivnostima Sportissima te izrazio zadovoljstvo zbog gostoprimstva i podrške Vlade Brčko distrikta BiH članovima i samoj školi.

Istaknuto je kako postoji veliki interes djece i mladih ljudi za bavljenje raznim sportovima, što dokazuju rezultati koji ostvaruju mladi sportisti Distrikta. Članovi Univerzalne škole sporta „Sportissimo“ su željeli da i uručivanjem vlastitih medalja izraze zahvalnost gradonačelniku na prijemu i ukazanoj podršci.

Nakon razgovora, gradonačelnik je s djecom obišao prostorije Vijećnice kako bi ih bolje upoznao sa simbolom našega grada.



# Čelnici Distrikta sastali se s predsjedavajućim arbitrom Arbitražnog tribunala za Brčko ambasadorom John Clint Williamsonom i supervizorom Scanlanom



Gradonačelnik Brčko distrikta Bosne i Hercegovine Esed Kadrić, zamjenik gradonačelnika Anto Domic, predsjednik Skupštine Siniša Milić i potpredsjednik Skupštine Ivo Filipović sastali su se s predsjedavajućim arbitrom Arbitražnog tribunala za Brčko ambasadorom Johnom Clintom Williamsonom i supervizorom za Brčko Michael Scanlanom te razgovarali o aktuelnim temama i dešavanjima na području Brčko distrikta BiH.

Arbitar Williamson naglasio je da Brčko distrikt Bosne i Hercegovine ima izuzetan strateški značaj u Bosni i Hercegovini, kao i da je zadovoljan trenutnom situacijom u Distriktu, te uputio pohvale za zabilježen napredak u protekle 3 godine u oblastima ekonomije, vladavini prava i borbi protiv korupcije, s obzirom da redovno prati stanje i odvijanje procesa u Distriktu. Naglasio je da svi akteri moraju biti svjesni da Brčko distrikt BiH uživa specijalan status i da arbitraža kao pravni mehanizam postoji nezavisno od Ureda Visokog predstavnika i aktivnosti koje provodi međunarodna zajednica u BiH te da je ona garant sigurnosti statusa Distrikta. Arbitar je pozvao čelne ljude Vlade i Skupštine Brčko distrikta BiH da nastave putem postignutog napretka, ali i naglasio da ima još puno posla koji se u interesu građana Distrikta treba obaviti te da im kao podrška na raspolaganju uvijek stoji supervizor za Brčko Scanlan. „Iskreno se nadam

da potrebe za sazivanjem Tribunala neće biti, ali želimo da je svima jasno da bi ta opcija bila na raspolaganju ukoliko se procijeni neophodnom“, poručio je ambasador Williamson, predsjedavajući arbitar Arbitražnog tribunala za Brčko.

Gradonačelnik Kadrić naglasio je da vlast ulaže enormne napore kako se uprkos negativnom narativu koji je prisutan u medijskim izvještavanjima ne bi destabilizirale institucije ili narušili zdravi multietnički odnosi u Brčko distriktu BiH i da su njegov dolazak i podrška međunarodne zajednice veoma važne za prevazilaženje trenutne krize u Bosni i Hercegovini. On je kazao da postoji još koraka koje je neophodno učiniti kako bi se potpuno provela arbitražna odluka od uspostave Distrikta, kao što je formiranje Odjeljenja za pravdu kao i Odjeljenja za finansije u Brčko distriktu BiH što iziskuje izmjene Statuta Brčko distrikta BiH, također važnog iskoraka za jačanje institucija Distrikta.

Zvaničnici su iskoristili prisustvo arbitra i supervizora da istaknu svoje negodovanje usljed izostavljanja Brčko distrikta BiH u raspodjeli sredstava od MMF-a namijenjenih budžetima u BiH za pomoć u prevazilaženju posljedica virusa korona, čime je učinjena velika nepravda ovoj lokalnoj zajednici u čemu su naišli na potpuno razumijevanje od strane arbitra Williamsona i supervizora Scanlana.

# Vlada usvojila treći rebalans Budžeta za 2021. godinu

Vlada Brčko distrikta BiH na 14. vanrednoj sjednici usvojila je treći i posljednji rebalans Budžeta za 2021. godinu u ukupnom iznosu od 16.414.000 konvertibilnih maraca, rekao je na konferenciji za medije gradonačelnik Esed Kadrić.

On je podsjetio da je osnovni motiv izrade rebalansa potreba da se kapitalni budžet iz 2019. godine ostavi u funkciji, kako bi se mogli nastaviti započeti projekti i aktivnosti na realizaciji tih projekata bez da se čeka rebalans u narednoj godini čime bi se izgubilo dragocjeno vrijeme.

„Jedini novi prihod rezultat je našeg rada u zajedničkom projektu prekogranične saradnje sa Vinkovcima iz Republike Hrvatske koji će svojim sredstvima opremiti obdanište u Dubravama. Iz kapitalnog budžeta za 2019. godinu prenosimo preko 14,5 miliona konvertibilnih maraka u 2022. godinu čime stvaramo mogućnost da se planirani novac može utrošiti u naredne tri godine. Preostali novac u rebalansu rezultat je ušteda u 2021. godini“ precizirao je gradonačelnik Kadrić.

Po njegovim riječima značajnije uštede ostvarili su u Odjeljenju za zdravstvo 795.000 KM, u Odjeljenju za komunalne poslove 400.000 KM, u Odjeljenju za obrazovanje 161.000 KM, u Odjeljenju za privredu 142.000 KM te u Policiji 40.000 KM.

„Ovu uštedu koju smo napravili u ovogodišnjem budžetu rasporedit ćemo tako što ćemo 185.000 maraka utrošiti za studentske stipendije na osnovu čega će svi studenti koji su aplicirali, a ispunjavaju uslove iz javnog poziva, dobiti stipendije. Dodatna sredstva za tri programa osigurali smo Odjeljenju za izbjegla i raseljena lica. Obezbijedeno je dodatnih 100.000 KM za program sanacije i rekonstrukcije u ratu porušenih stambenih objekata za listu koja je već objavljena. Iznos od 100.000 KM obezbijeden je i za projekat obnove individualnih stambenih objekata raseljenih lica i povratnika, a 50.000 KM je predviđeno za projekat stambenog zbrinjavanja raseljenih lica koja se žele integrisati u lokalnoj zajednici“, istakao je gradonačelnik Kadrić.

Među kapitalnim projektima za koje je obezbijeden novac u ovom rebalansu, gradonačelnik Kadrić je naveo rekonstrukciju objekta Kamerni teatar u

Brčko distriktu BiH za šta je predviđeno dodatnih 150.000 KM kako bi se krenulo s realizacijom ovog, za Brčko veoma važnog projekta.

„Odjeljenju za zdravstvo u rebalansu smo obezbijedili 130.000 KM za nabavku vozila za prevoz dijaliznih pacijenata te za neke druge potrebe Odjeljenja. Vrijedni isticanja su zahtjevi Odjeljenja za obrazovanje što je Vlada prihvatila te smo obezbijedili po 150.000 za dva nova obdaništa koja ćemo graditi u mjesnoj zajednici Srpska Varoš i Broduša. Za ove objekte privode se kraju aktivnosti na pribavljanju građevinskih dozvola i uskoro možemo pristupiti njihovoj izgradnji za koje, da podsjetim, već ranije imamo izdvojena određena sredstva. U rebalansu je izdvojeno i 400.000 KM za nastavak izgradnje fiskulturne sale za Poljoprivrednu i medicinsku školu u Brčko distriktu BiH. Objekat je već započet i taj novac je za realizaciju sljedeće faze“ naglasio je gradonačelnik Kadrić.

Među kapitalnim projektima koji će biti finansirani novcem iz danas usvojenog rebalansa nalazi se, kako je istakao gradonačelnik Kadrić, i nastavak izgradnje pješačke zone u Brčko distriktu BiH.

„Za projektovanje nastavka radova u ulici Islahijet i dijelu ulice Ive Andrića koji vodi od Četvrtе osnovne škole do šetališta u Pješačkoj zoni izdvojeno je 50.000 KM. Za nastavak izgradnje pješačke zone niz Konačko brdo do Savske džamije, za šta već imamo građevinsku dozvolu, obezbijedili smo 200.000 KM. Još je obezbijedeno 50.000 KM za uređenje prostora za potrebe boračko-invalidske zaštite pripadnika Vojske Republike Srpske u mjesnoj zajednici Srpska Varoš. U rebalansu smo obezbijedili i potrebna sredstva da se Javno preduzeće „Radio Brčko“ preregistruje u Javnu radio-novinsku ustanovu „Radio Brčko“, izjavio je na konferenciji za medije brčanski gradonačelnik Esed Kadrić.

On je još jednom podsjetio da je rebalans rezultat prenošenja sredstava iz kapitalnog budžeta za 2019. godinu, ali i da su uštede iz ovogodišnjeg budžeta kvalitetno raspoređene u planirane kapitalne projekte.



## U Vijećnici organizovan prijem za Brčanku Doris Živković, evropsku prvakinju u kik-boksu

Gradonačelnik Brčko distrikta Bosne i Hercegovine Esed Kadrić u Gradskoj vijećnici zajedno sa svojim zamjenikom Antom Domićem i glavnim koordinatorom Vlade Željkom Antićem organizovao je prijem za Doris Živković iz Brčkog koja je na evropskom takmičenju u kik-boksu osvojila prvo mjesto.

Gradonačelnik je iskoristio priliku i čestitao Doris na osvojenom zlatu te naglasio da su svi sretni što Brčko ima evropsku prvakinju.

„Za našu lokalnu zajednicu to je veliki ponos i moram kazati da je to nešto što je afirmisalo i BiH i Distrikt. Razgovarali smo o njenim napornim treninzima koje su je doveli do ovog uspjeha. Iskazali smo punu podršku da budemo od onih koji će pratiti njen daljnji sportski angažman i zacrtane

ciljeve u budućnosti. Ovo je uistinu dostojno velikog divljenja jer za vrlo kratak period od dvije godine i napornih treninga ostvariti ovakav rezultata i postati prvak Evrope, to je veliki podvig“, kazao je Kadrić.

Na kraju prijema Doris se zahvalila gradonačelniku i njegovim saradnicima na poklonima kao i na ukazanoj podršci.

„Hvala i treneru Vedadu Mulaomeroviću, roditeljima kao i prijateljima koji su mi pomogli da ostvarim veliki rezultat. Nadam se da ću i u narednom periodu da predstavljam svoj grad, svoju državu u što boljem svjetlu i da ću osvojiti još puno zlatnih medalja za Brčko distrikt BiH“, kazala je Živković.

# Dogovorena podrška Distriktu od Vlade Federacije BiH

Gradonačelnik Brčko distrikta BiH Esed Kadrić zajedno sa šefom Odjeljenja za komunalne poslove Majazudinom Vehabovićem, održao je sastanak s premijerom Federacije Bosne i Hercegovine Fadilom Novalićem i zamjenikom ministra komunikacija i prometa Bosne i Hercegovine Nedžadom Brankovićem na kojem su razgovarali o cestovnoj i komunalnoj infrastrukturi u Brčko distriktu BiH.

S obzirom da Brčko zauzima centralnu geografsku i saobraćajnu vezu u izgradnji cestovne infrastrukture i plinovoda koji će biti na koridorima kroz Distrikt, gradonačelnik Kadrić je na sastanku upoznao premijera Novalića s dosadašnjom izradom prostornog plana kada je u pitanju realizacija potpisanog sporazuma o realizaciji projekta autoputa Beograd Sarajevo, te najavio organizovanje sastanka između dva premijera i Vlade Distrikta po ovom pitanju.

„Obradovan sam spoznajom da Brčko ima mogućnost da se uključi s još jednom dionicom plinovoda koja bi išla od Županje ka Orašju i potencijalno se vezivala na trasu plinovoda koju će graditi Vlada Republike Srpske te mogućnost da to bude centralno čvorište i prema Tuzli i prema Banjoj Luci, tako da ima razloga da se u narednom periodu okupljamo u Brčkom te da, i u simboličnom smislu, krene realizacija velikih projekata s područja Distrikta Brčko koji su od značaja za cijelu Bosnu i Hercegovinu“, kazao je Kadrić.

Gradonačelnik je upoznao premijera s preduzetim aktivnostima Vlade Distrikta od svog formiranja, naročito kada je u pitanju podizanje privredne aktivnosti lokalne zajednice, a govorilo se i o odnosu entiteta prema Distriktu.

„Dotakli smo se one neugodne situacije kada je u pitanju podjela pomoći od strane MMF-a u kojem je izostavljen Brčko distrikt BiH. Premijer Novalić se već angažovao za izdvajanje jednog dijela iz budžeta Federacije, odnosno postoje dogovori i s premijerom Vlade Republike Srpske da i on nešto slično uradi, kako bi pružili pomoć i podršku Distriktu odnosno taj dio sredstava bi predstavljao kompenzaciju za ono što je Distrikt izostavljen u raspodjeli sredstava MMF-a“, istakao je gradonačelnik.

Na sastanku se govorilo i o aktivnostima rekonstrukcije Savskog mosta kao i projekta Luka Brčko, za čiju revitalizaciju i funkciju postoji veliko zanimanje Vlade Federacije, a također se govorilo i o budućim zajedničkim projektima.

„Vlada Federacije će imati znatno veće prisustvo na teritoriji Brčko distrikta BiH jer smo vođeni interesima i zanimanjima za vrlo važne događaje ovdje u Distriktu. To je, prije svega, moguće funkcioniranje Luke Brčko, za koju se sada investira u mnogo većem obimu. Jedinu željezničku kružnu konekciju prema Luci Brčko imaju željeznice Federacije, odnosno Federacija, i to je sada probudilo naš interes kada je u pitanju taj segment. Mi ćemo sa svoje strane naložiti Željeznicama Federacije da odmah pristupe izradi projekta elektrifikacije od Tuzle do Brčkog jer vidimo da postoji međudržavni interes da se ta elektrifikacija produži dalje do Vinkovaca“, kazao je premijer, te dodao da Federacija ima namjeru raditi i projekat plinovoda Županja Orašje Brčko Tuzla i dalje prema Kladnju.

To bi bila nova konekcija koja će se nominirati za međudržavne razgovore i pregovore, a pri projektovanju ovog puta uključit će i projektovanje plinske komunikacije koja bi išla od Županje dalje prema Brčkom i dalje prema centru Federacije, zajedno s autoputem.

Premijer je obišao i nove prostorije Ureda Vlade Federacije Bosne i Hercegovine koje se nalaze u zgradi „BH Telecom“ Brčko, a uredom će se omogućiti neposrednija saradnja institucija FBiH i Distrikta na realizaciji prethodno spomenutih projekata.

Nakon održanog sastanka, gradonačelnik Kadrić je zajedno s premijerom Novalićem obišao preživjele članove porodice Salihović, čijih je sedam srodstvenika stradalo 23. oktobra u požaru u brčanskom naselju Suljagić sokak. Njima je Vlada Brčko distrikta BiH osigurala alternativni smještaj u naselju Brka do završetka izgradnje nove stambene kuće, a Vlada Federacije Bosne i Hercegovine će također izdvojiti određeni iznos sredstava za pomoć ovoj porodici.





## Gradonačelnik Distrikta i Gradonačelnik grada Vinkovci potpisali Memorandum o uspostavljanju suradnje

Gradonačelnik Brčko distrikta Bosne i Hercegovine Esed Kadrić zajedno sa svojim suradnicima, upriličio je posjet delegacije gradske uprave grada Vinkovci, Republike Hrvatske, na čelu s gradonačelnikom Ivanom Bosančićem, njegovim suradnicima i ravnateljicom Razvojne agencije Vinkovci.

Kako je kazao gradonačelnik Kadrić, radi se o uzvratnoj prijateljskoj posjeti jer su ova dva grada oduvijek bili međusobno povezani. „Mnoge Brčake su u svijet vodili putevi preko Vinkovaca, mnogi su tamo našli svoj dom ili imaju brčanske korijene, a u Vinkovcima žive i rade. Sada naše iskreno prijateljstvo stvara uvjete za suradnju i međusobnu pomoć na mnogim poljima“, istakao je. U proteklom razdoblju, Vlada Brčko distrikta BiH je prepoznala različite procese i aktivnosti koji se vode u Vinkovcima, a mogu poslužiti kao primjer za razvoj ove lokalne zajednice, te se na odvojenim sastancima razgovaralo o rješavanju problema odlaganja otpada, organizaciji kulturnog života, institucija, razvojne agencije, turističke zajednice i kazališta, što je jedna od aktuelnih tema u Distriktu osnivanje brčanskog kamernog teatra.

U tijeku današnje posjete, potpisan je Memorandum o uspostavljanju suradnje između Brčko distrikta i Vinkovaca, kojim se utvrđuje da postoji zajednički interes za uspostavljanje međusobne suradnje i

prijateljskih odnosa u cilju društvenog i ekonomskog razvoja.

„Upoznao sam gradonačelnika Bosančića s činjenicom da se Brčko, zajedno s Federacijom, opredijelilo za elektrifikaciju pruge Tuzla Brčko Vinkovci, te će nam trebati njihova pomoć za realiziranje ovog važnog zajedničkog međudržavnog projekta“, kazao je Kadrić. Gradonačelnik Vinkovaca Ivan Bosančić potvrdio je kako postoji veliki broj područja za suradnju između ova dva grada, poglavito kada je u pitanju cestovna povezanost, što će biti okosnica za budući ekonomski razvoj i Distrikta i Vinkovaca.

„Vjerujemo da ćemo kroz naš Memorandum dati priliku da prenesemo jedni na druge iskustva iz različitih područja kao što su kultura, europski fondovi, društvene djelatnosti, obrazovanje. Ono što me posebno potaknulo i posebno veseli je što sam vidio jedan snažan entuzijizam i želju od strane kolega iz Brčkog da surađujemo i vjerujem da ćemo u budućnosti puno toga zajednički učiniti i iskoristiti europski novac koji bude dostupan“, izjavio je Bosančić. Zajednička suradnja ove dvije zajednice uspostavljena je prethodno kroz europski projekat nazvan „Prijateljstvo bez granica“, a vezano za financiranje uređenja dijela vrtića jaslica u Brčko distriktu BiH, u mjestu Dubrave.

# Usvojen nacrt Zakona o socijalnom poduzetništvu Brčko distrikta BiH

Vlada Brčko distrikta Bosne i Hercegovine je na 34. redovitoj sjednici usvojila nacrt Zakona o socijalnom poduzetništvu Brčko distrikta BiH na prijedlog Odjela za gospodarski razvitak, šport i kulturu.

Kako je na konferenciji za medije kazao predstojnik Odjela Pero Gudeljević, radi se o pravnoj materiji koja je novost na prostoru Bosne i Hercegovine, a kojim se uređuje status i registar socijalnih poduzeća, uvjeti i postupak za stjecanje statusa socijalnog poduzeća, prestanak poslovanja, podrška razvoju socijalnog poduzetništva, kao i pitanja od značaja za socijalno poduzetništvo i socijalna poduzeća na prostoru Distrikta. Gudeljević je pojasnio kako se pod socijalnom ekonomijom podrazumijeva ekonomija čiji svrsishodni cilj nije ostvarivanje dobiti, te će kroz ovaj Zakon biti regulirano da 49 posto dobiti ovih poduzeća može biti podijeljeno među vlasnicima

kapitala, odnosno suvlasnicima firmi što će biti jedan od uvjeta poduzećima za stjecanje statusa socijalnog.

„Socijalno poduzetništvo je inovativni, novi pristup i način rješavanja društvenih problema poput socijalnih, zdravstvenih, ekoloških pitanja kao i svega onog što Vlada, kroz druge programe, može teško ostvariti. Tu mislim na zapošljavanje kategorija stanovništva koje su teže za uposliti, dakle osoba koje spadaju u marginalne skupine, tako da će to biti jedan od osnovnih uvjeta za stjecanje statusa socijalnog poduzeća“, kazao je Gudeljević.

Ovim Zakonom se ujedno predviđa osnivanje vijeća ili savjeta za praćenje rada socijalnih poduzeća gdje će Vlada imati svoj utjecaj, a resorni odjel će voditi evidenciju o tim poduzećima i potvrđivati njihov status.

## „Taekwondo klub Brčko“ na prijemu kod gradonačelnika

Gradonačelnik Brčko distrikta Bosne i Hercegovine Esed Kadrić u Gradskoj vijećnici organizirao je prijem za članove Taekwondo kluba Brčko distrikta BiH kao i predsjednika Taekwondo saveza Bosne i Hercegovine.

Gradonačelnik je uputio čestitke povodom ostvarenih rezultata prisutnih članica ovog kluba, sestara Milice i Jelene Vasić, koje su osvojile europske medalje u ovom sportu.

„Mi smo kao grad pružali podršku i prepoznali talente u Taekwondo klubu Brčko i danas su nam naše dvije sugrađanke, dvije sportašice, došle pokazati svoje uspjehe i rezultate koje su postigle na Europskom prvenstvu u Estoniji. Nastavit ćemo podržavati ovaj klub i njegove članove kako bi se ovaj olimpijski sport dodatno afirmirao u Brčko distriku“, izjavio je gradonačelnik Kadrić.

Predsjednik Taekwondo saveza Bosne i Hercegovine Samir Šarić zahvalio se na prijemu te je istakao da postoji ideja da se iduće godine organizuje državno prvenstvo ili kup Bosne i Hercegovine upravo u Brčkom, kako bi se ovaj sport bolje predstavio građanima Brčkog. „Taekwondo savez Bosne i Hercegovine pruža na čitavoj državnoj teritoriji podršku klubovima i ovdje smo danas da podržimo Milicu i Jelenu, da sve propratimo do seniora i da ih vidimo na Olimpijadi“, rekao je Šarić.

TRG MLADI  
BRČKO

# Gradonačelnik najavio početak tradicionalne manifestacije „Čari zime“



Brčko distrikt BiH

Брчко ДИСТРИКТ БиХ

# Čari zime Чари зиме

Gradonačelnik Brčko distrikta Bosne i Hercegovine Esed Kadrić zvanično je najavio početak manifestacije „Čari zime u Brčko distriktu BiH“ koja će se održavati na Trgu mladih u toku mjeseca decembra 2021. i januara 2022. godine.

„Ovom manifestacijom nastojimo dodatno obogatiti našu turističku ponudu tokom zimskog perioda i mogućnost lokalnim proizvođačima da promovišu svoje proizvode i već je krenuo postupak postavljanja drvenih kućica za izložbeni i prodajni program u duhu same manifestacije. Ono što je novina ove godine jeste klizalište na Trgu mladih. Opredijelili smo se da klizalište bude otvoreno svakim danom od 10.00 do 21.00 sat, da cijena ulaznica bude simbolična, u visini od 1 KM, a ponedjeljkom i petkom će biti besplatno klizanje za sve učenike osnovnih škola sa područja Brčko distrikta BiH u periodu od 14.00 do 15.00 sati“, kazao je Kadrić.

Gradonačelnik je najavio održavanje koncerta, otkrivši ko će prisutne uvesti u Novu godinu. „Imat ćemo organizovan novogodišnji koncert na Gradskom trgu gdje će izvođač biti regionalna zvijezda Nina Badrić i sve ćemo upotpuniti vatrometom u ponoć“, izjavio je.

Kadrić je kazao da je bilo dilema u donošenju odluke za organizovanje ove tradicionalne manifestacije i dočeka zbog trenutne epidemiološke situacije, ali da je ipak odlučeno da se zimski mjeseci učine ugodnijima svima koji borave ili će boraviti u tom periodu u Brčko distriktu. Svi ovi projekti finansirani su iz Kabineta gradonačelnika.

Podsjećamo, svi zainteresovani za učešće u manifestaciji „Čari zime u Brčko distriktu BiH“ mogu da se prijave putem novootvorene web stranice ove manifestacije ili formulara dostupnog i na stranici društvene mreže Facebook putem linka: [Čari zime - prijavni obrazac /](#)

# Delegacija FBiH sa zvaničnicima Distrikta o značajnim infrastrukturnim projektima za BiH

Gradonačelnik Brčko distrikta Bosne i Hercegovine Esed Kadrić u zgradi Vijećnice zajedno sa zamjenikom gradonačelnika Antom Domićem, glavnim koordinatorom Vlade Distrikta Željkom Antićem i svojim saradnicima primio je delegaciju Vlade Federacije BiH na čelu s premijerom Fadilom Novalićem.

U okviru posjete održan je i radni sastanak na kojem su razgovarali o koridoru autoceste Beograd Sarajevo, sa odvojkom za Orašje, elektrifikaciji pruge Doboj Tuzla Brčko Vinkovci kao i plinskom koridoru Kladanj Tuzla Brčko Orašje Županja.

Gradonačelnik Distrikta kazao je da je danas održan značajan sastanak na kojem se razgovaralo o tri važna infrastrukturna projekta koja su važna za cijelu BiH.

„Definisali smo zaključke, rokove kao i nosioce ovih značajnih aktivnosti. Distrikt razumije svoju ustavnu i geografsku poziciju koju ima i mi ćemo nastaviti raditi s Vladom FBiH i Vladom Republike Srpske na realizaciji svih ovih projekata, ali i onih projekta koji su neophodni da se realizuju i u koje treba biti uključen Distrikt. Autocesta Beograd Sarajevo je sastavni dio autocesta koje trebaju da rade javna preduzeća autoceste iz Federacije i RS-a i Distrikt će imati značajnu ulogu u koordinaciji svih aktivnosti koji se tiču dionica koje će prolaziti kroz ovu lokalnu zajednicu. Kada je u pitanju plinovod obradovani smo činjenicom gdje se FBiH opredijelila za koridor plinovoda od Županje preko Orašja. Mi u prostornom planu već imamo dionicu od Bijeljine prema Banjoj Luci tako da će naša uloga biti značajna i po ovom pitanju”, kazao je Kadrić.

Gradonačelnik je istakao i značajnost elektrifikacije pruge Tuzla Brčko Vinkovci, međunarodni projekat, koji bi dodatno, kako je naglasio, osnažio i potencijale brčanske „Luke”.

„Vlada Distrikta će ubrzo imati sličan sastanak i s Vladom RS-a, a nakon toga ćemo se ponovo svi okupiti ovdje kako bi krenuli raditi na dobrobit svih građana BiH”, kazao je Kadrić.

Premijer FBiH Fadil Novalić na konferenciji za medije kazao je da su projekti predviđeni i u budžetu FBiH koji, kako je kazao, još nisu na parlamentu.

„165 miliona maraka je praktično vezano za ove tri tačke i cilj nam je da počnemo s radom sljedeće godine. Također, dvije od ove tri tačke imaju veze i sa Hrvatskom i radi se o interkonekcijama tako da će Vlada FBiH kroz naša dva ministarstva uputiti Vijeću ministara BiH zahtjev za kontakt sa hrvatskom stranom. Radi se o značajnim projektima za BiH i u interesu je svih nas da uspješno realizujemo ove aktivnosti“, kazao je Novalić.

Premijer Tuzlanskog kantona Kadrija Hodžić kazao je da današnji sastanak smatra velikim iskorakom.

„Mi smo danas s ova tri projekta napravili značajan pristup deblokadi, naročito s prvim projektom koji podrazumijeva autocestu Tuzla Brčko Orašje što je za nas jako bitno jer do sada nismo imali niti jedan metar autoceste, brzih cesta, a i sama struktura magistralnih cesta je bila čak najoskudnija ako se gleda po broju stanovnika. Drugi projekat koji podrazumijeva elektrifikaciju željezničke pruge Doboj Tuzla Brčko je za Tuzlanski kanton jako bitan s obzirom na energetske rudarski i privredni potencijal koji je jedan od najvećih u ovoj zemlji. Također, treći projekat po prvi put spominje i plinifikaciju Tuzlanskog kantona“, kazao je Hodžić.

Premijer Posavskog kantona Đuro Topić naglasio je da je za Posavski kanton važna autocesta Tuzla Brčko Orašje i, kako je kazao, nada se da će se iduće godine krenuti s konkretnom izgradnjom kao i plinifikacija.

„Mi u Posavskom kantonu smo već pripremili prostorni plan koji ovih dana ulazi u javnu raspravu i vjerujem da ćemo za tri do četiri mjeseca biti spremni“, naglasio je Topić.

Gradonačelnik Tuzle Jasmin Imamović izjavio je da se od 2002. govori o putnoj deblokadi sjeveroistočne Bosne na kojem se, kako je podsjetio, naslanja milion stanovnika.

„To je demografski i ekonomski najpotentniji dio BiH i bilo bi dobro da se s time krene iduće godine. Također, bitna je i elektrifikacija pruge Tuzla Doboj i Tuzla Brčko. Mi smo ovim sastankom i planovima koji su proizašli iz ovog sastanka zadovoljni“, kazao je Imamović.

Pored premijera Novalića, Topića, Hodžića i Imamovića sastanku su prisustvovali i federalni ministri prometa i komunikacija Denis Lasić, energije, rudarstva i industrije Nermin Džindić, koordinator Vlade FBiH za Brčko distrikt BiH Alija Osmanbašić, načelnik Općine Orašje Marijan Oršolić, te direktori JP „Autoceste“ FBiH Elmedin Voloder, JP „Željeznice“ FBiH Enis Džafić, BH Gasa Mihajlo Krmpotić i direktor BH Telecoma Sedin Kahrman.

Nakon sastanka, gradonačelnik Brčko distrikta BiH i premijer Federacije BiH otvorili su nove prostorije koordinатора Vlade FBiH za Brčko distrikt BiH u zgradi BH Telecoma u Brčkom.





## Амбасадор Краљевине Норвешке у БиХ боравио у првој службеној посјети Дистрикту

Градоначелник Брчко дистрикта Босне и Херцеговине Есед Кадрић у Вијећници заједно с главним координатором Владе Жељком Антићем и шефом Кабинета градоначелника Мујом Хацићем примио је у првој службеној посјети Дистрикту амбасадора Краљевине Норвешке у БиХ Њ. Е. Олева Реинертсена.

Градоначелник је амбасадору зажелио добродошлицу, те упознао га са тренутном политичком и економском ситуацијом у Дистрикту, значајним инфраструктурним пројектима као и досадашњим пословним размјенама између Норвешке и ове локалне заједнице. У току разговора градоначелник је изразио очекивања да ће та сарадња бити и настављена.

Амбасадор Реинерстен се захвалио градоначелнику на пријему те изразио увјерење да ће Норвешка наставити сарадњу с БиХ као и Дистриктом и да ће бити увијек спремна за разговоре. Амбасадор је упознао градоначелника и о идејама и приједлозима за могућа инвестирања и најавио посјету од стране норвешке делегације. Састанку присуствовала је и Сири Андерсен, замјеница амбасадора Краљевине Норвешке у БиХ.

Подсјећамо, на простору Брчко дистрикта БиХ



у периоду од 2004. године Норвешка народна помоћ је од минско-експлозивних средстава ослободила око 8 милиона квадратних метара земљишта.

Средином октобра 2021. године отворен је још један пројекат Брчко Сјевер површине милион и 33.000 квадратних метара, чији је извођач Норвешка народна помоћ из Сарајева. Средства су обезбијеђена од стране амбасаде Норвешке и Швајцарске у БиХ и пројекат би требало да буде завршен до прољећа идуће године који обухвата четири брчанске мјесне заједнице: Марковић Поље, Ланишта, Доњи Вукшић и Грбавица.

U okviru manifestacije „Čari zime u Brčkom” svečano je počela klizališna sezona na Trgu mladih u Brčkom koja će trajati do kraja januara 2022. godine.

Ovu ceremoniju dodatno je uljepšao i klizački klub „Ice Group” iz Sarajeva koji je prošle godine osvojio četiri medalje na regionalnim takmičenjima što ih čini najbolje plasiranim klubom umjetničkog klizanja u BiH. Nastupila je najmlađa takmičarka Ada Korić sa svojim Waltz of Roses programom, Liv Candler (novopridružena članica iz Omaha, Amerike) sa svojim Ay Ilorona programom i Lea Salihagić sa Mas Que Nada programom.

Klizalište će biti otvoreno svakim danom od 10.00 do 21.00 sat, a cijena ulaznice iznosit će jednu konvertibilnu marku. Ponedjeljkom i petkom besplatno klizanje će biti za sve učenike osnovnih škola s područja Brčko distrikta BiH u periodu od 14.00 do 15.00 sati.

Svečanom puštanju u rad klizališta prisustvovao je i gradonačelnik Brčko distrikta Bosne i Hercegovine Esed Kadrić.

Manifestacija „Čari zime” ponudit će i turističku ponudu tokom zimskog perioda i mogućnost lokalnim proizvođačima da promovišu svoje proizvode. Također, na Trgu mladih 31. 12. održat će se i koncert regionalne muzičke zvijezde Nine Badrić uz vatromet koji će se prirediti tačno u ponoć.



# Čari zime

## Na Trgu mladih svečano počela klizališna sezona

# Градоначелник одржао састанак с министром енергетике и рударства РС-а

Градоначелник Брчко дистрикта Босне и Херцеговине Есед Кадрић у Градској вијећници заједно с главним координатором Владе Жељком Антићем и шефом Одјељења за комуналне послове Мајазудином Вехабовићем одржао је састанак са министром за енергетику и рударство Републике Српске Петром Ђокићем и његовим сарадницима.

На састанку се разговарало о значајним инфраструктурним пројектима за БиХ важним истовремено и за Дистрикт.

„Када је у питању гасовод циљ нам је да испунимо наше обавезе како не бисмо кочили реализацију пројекта. Искористили смо прилику и захвалили се министру Ђокићу на његовом ангажману око обезбјеђивања Дистрикта електричном енергијом за наредну годину као и његов ангажман на изградњи мултифункционалног објекта у МЗ Грбавица који ће се финансирати средствима Владе РС-а. Ми ћемо обезбиједити сву неопходну документацију и наставићемо интензивно сарадњу на овом нашем заједничком послу“, казао је Кадрић.

Он је нагласио да се, након посјете делегације Федерације БиХ Дистрикту, ускоро очекује и посјета премијера Владе РС-а с министрима и директорима јавних предузећа како би се позиционирала сва важна питања која се односе на аутопутеве и

на, како је казао, енергетске коридоре који пролазе кроз Брчко дистрикт БиХ.

„Жеља нам је да све буде како треба и да не дође до кочења ових великих пројеката који се тичу свих грађана БиХ“, казао је Кадрић.

Министар за енергетику и рударство РС-а Петар Ђокић казао је да на пројектима треба устрајати и да су пројекти итекако важни и за Дистрикт.

„Дистрикт је значајан дио радова на експропријацији аутопута Бијељина–Брчко, Брчко–Вукозавље урадио. Уз трасу аутопута планиран је и гасовод и важно је да Дистрикт изражава спремност да учествује у овом пројекту како би се за ову локалну заједницу у наредном периоду обезбиједио гас као енергент будућности и енергент који даје сигурност. Требамо да идемо у овај пројекат у будућности значајан за заштиту околине, побољшања квалитета ваздуха, односно живота. Значајно је да је градоначелник Кадрић изразио спремност и одлучност да уђе у овај пројекат. План је РС-а да на прољеће идуће године кренемо у оперативну изградњу гасовода од Новог села, општина Бијељина, који би ишао дефинисаном трасом аутопута и кроз територију Дистрикта“, казао је Ђокић.

Он је истакао да је градоначелник Дистрикта говорио и о идеји да постоји и мјерно регулациона станица која би имала могућност прихвата гаса, како је казао, не само из наведеног гасовода, него и из правца Хрватске.

„То ће бити добро да Брчко буде обезбијеђеноса двије стране могућности обезбјеђења гаса што ће му давати предност да се определијели за опцију која буде за њега повољнија“, казао је Ђокић.


Поред гасовода, на састанку се разговарало и о снабдијевању електричном енергијом и изградњи енергетских објеката.

„Брчко се дуги низ година снабдијева електричном енергијом искључиво из РС-а. Обезбиједили смо повољније услове снабдијевања и чинимо то дуги низ година. Да се набавља од других добављача била би знатно скупља и остаће такав однос и у наредној години, дефинисан онако како је двогодишњим уговором и прецизирано. Говорили смо и о могућности изградње енергетских објеката на подручју Дистрикта и постоји већ интерес за изградњу таквих објеката као што су електране. За сунчеву енергију сигуран сам да овдје има капацитета, има простора гдје се такве соларне електране и већег капацитета могу градити. Такођер, градоначелник је најаво и могућност да ће се подстицати изградња и индивидуалних енергетских објеката, постројења на кућама, на привредним објектима, што је значајно“, казао је Ђокић.

Директор фирме „Гас-Рес“ из Бање Луке Љубо Гламочић казао је да је данас била прилика да се детаљно конкретизују детаљи гасовода и договори интензивнија сарадња.

„Ми смо ове активности почели прошле године. Дефинисали смо трасу идеалног рјешења за сам гасовод и утврдили грађевинску линију, практично од Дрине до Новог града и наравно уз коридор аутопута иде и коридор гасовода. Оно што је кључно напоменути јесте да Брчко тренутно ради просторни план и да се у том просторном плану тачно дефинише сам коридор. Још једна активност која је тренутно у току јесте израда студије изводљивости за изградњу самог гасовода. Том студијом смо обухватили и Брчко, потрошњу гаса везано за потребе привреде и становништва. Урадили смо и мапу пута и утврдили да бисмо негдје крајем 2024. године могли имати прве потрошаче гаса на овој линији“, казао је Гламочић.





## Представници Јединице за имплементацију пројеката посјетили Канцеларију координатора Брчко дистрикта БиХ у Савјету министара БиХ

Координатор Канцеларије Брчко дистрикта БиХ у Савјету министара БиХ Мирослав Гаврић са сарадницима примио је у радну посјету представнике Јединице за имплементацију пројеката из међународних фондова Развојно-гарантног фонда Брчко дистрикта БиХ.

Састанак је организован с циљем упознавања Канцеларије координатора с активностима новоформиране Јединице у оквиру које дјелују Подјединица за кредитне пројекте и Подјединица за донаторске пројекте.

На састанку је, између осталог, разговарано о заједничким правцима дјеловања о будућим активностима које се односе на подршку Влади Брчко дистрикта БиХ. На приједлог координатора Гаврића договорена је интензивнија сарадња у оквиру Програма интегрисаног развоја коридора ријека Сава и Дрина и кандидовању пројеката ка Свјетској банци.

„Предложио сам да сачинимо заједнички Акциони план дјеловања и комуникације у 2022. години, који би се односио на заједничке активности и организацију састанака са међународним финансијским

институцијама, амбасадама и фондовима у 2022. години, односно могућности кандидовања различитих пројеката, како би заједничким снагама била постигнута боља заступљеност и видљивост Брчко дистрикта БиХ. Тај план би путем Канцеларије градоначелника био предложен и усвојен од стране Владе Брчко дистрикта БиХ” рекао је Гаврић.

У том контексту, шеф Јединице за имплементацију пројеката Златан Мусић истакао је да су упућена иницијална писма према кључним донаторским институцијама у БиХ, који подржавају развојне активности у локалним заједницама.

„Постоји висок степен заинтересованости међународних организација за пружање подршке Јединици за имплементацију пројеката у складу с приоритетима дефинисаним у Стратегији развоја Брчко дистрикта БиХ 2021–2027. Стога, очекујемо да у наредном периоду сарадња с Канцеларијом Брчко дистрикта у Савјету министара доведе до конкретних резултата за добробит свих грађанки и грађана Брчко дистрикта БиХ”, поручио је Мусић.

## Gradonačelnik humanitarnu pomoć i novogodišnje paketiće uručio ugroženoj djeci i osjetljivim kategorijama stanovništva

U okviru godine solidarnosti koju je u čitavom svijetu obilježila pandemija korona virusa gradonačelnik Brčko distrikta Bosne i Hercegovine Esed Kadrić opredijelio se da ove godine umjesto podjele u brčanskim vrtićima novogodišnje paketiće i humanitarnu pomoć uruči ugroženoj djeci i osjetljivim kategorijama stanovništva.

Cijeneći da najveći broj roditelja djece u vrtićima može osigurati ovu vrstu poklona gradonačelnik se odlučio da obraduje one mališane kojima roditelji nisu u mogućnosti osigurati ovaj vid poklona te obradovao one koji imaju zdravstvene probleme, djecu bez roditeljskog staranja kao i manjinske romske populacije. Tim povodom gradonačelnik je posjetio romsku djecu u Dnevnom centru u brčanskom naselju Brod i uručio im paketiće, a nakon toga prehrambene pakete uručio je i porodici Tirić, djeci bez roditeljskog staranja koja živi u naselju Brod kao i socijalno ugroženoj porodici Maleš iz naselja Ploštare. Tokom posjete gradonačelnik je istakao važnost saradnje i solidarnosti prema porodicama koje vode egzistencijalnu bitku te naglasio i važnost efikasne međusobne podrške i saradnje između različitih društvenih i socijalnih grupa.

Paketiće je poklonio i Fondaciji Lajla koja brine o djeci s Daunovim sindromom, djeci na Odjeljenju brčanske pedijatrije, te udruženjima koja okupljaju djecu s rijetkim bolestima.



## Gradonačelnik posjetio firmu za proizvodnju modularnih i montažnih objekata „Liberty Group“ Brčko

Gradonačelnik Brčko distrikta Bosne i Hercegovine Esed Kadrić posjetio je firmu „Liberty Group“ iz Brčko koja se bavi proizvodnjom modularnih i montažnih objekata, ALU stolarije i fasadnih sistema za američko i evropsko tržište.

Tom prilikom vlasnik firme „Liberty Group“ Elvir Šehić i izvršni direktor Dino Šaćirović gradonačelnika su upoznali s radom ove firme, postrojenjima za izradu modularnih objekata kao i projektima na kojima trenutno rade.

Gradonačelnik je tokom razgovora podržao planirane ciljeve ove firme i obećao da će Vlada pružiti pomoć kako bi se ovaj privredni subjekt uspješno dalje razvijao s ciljem proširenja kapaciteta i dodatnog zapošljavanja.

Direktor Šehić se zahvalio gradonačelniku na posjeti i interesovanju za ovu firmu kao i pruženoj podršci.

„Liberty Group“ Brčko trenutno zapošljava 70 ljudi, a nakon proširenja kapaciteta očekivanja su da se broj zaposlenih poveća.



# U Vijećnici upriličen prijem za prosvjetne radnike dobitnike prestižnih priznanja

Gradonačelnik Brčko distrikta Bosne i Hercegovine Esed Kadrić u prostorijama Vijećnice upriličio je prijem za prosvjetne radnike s područja Distrikta koji su dobitnici prestižnih priznanja za svoj rad.

Gradonačelnik se zahvalio prisutnima za dosadašnji uloženi trud i što su ostvarili da njihov rad bude prepoznat i izvan granica BiH.

„Važni su nam ovakvi susreti i ponosni smo svi na ova ostvarenja koja su značajna i za sve građane Distrikta i BiH. Hvala im što su učinili Distrikt prepoznatim i što su ujedno i motivacija učenicima da idu tim putem. Bitno je da se krećemo naprijed u pozitivnom smjeru i takve aktivnosti ću uvijek podržati“, kazao je Kadrić.

Nastavnici i učenici su se zahvalili na prijemu i što je gradonačelnik prepoznao njihove inicijative i zalaganja, te naglasili da im je to dodatni podstrek za daljnji rad.

Prijemu su prisustvovali i šef Odjeljenja za obrazovanje Zoran Bulatović i šefica Pododjeljenja za osnovno obrazovanje Mara Matkić koji su iskoristili

priliku i čestitali prisutnima na ostvarenim rezultatima i poručili da tim putem i nastave.

British Council u BiH realizovao je projekt „Škole za 21. stoljeće“ i u okviru tog programa svaka škola na Zapadnom Balkanu je dobila određen broj micro:bit uređaja džepnih računara na kojima djeca mogu kodirati i koristiti ih za rješavanje svakodnevnih problema iz raznih školskih predmeta. Na kraju projekta održano je online takmičenje na koje je apliciralo 160 škola i među deset najuspješnijih škola četiri škole su iz Brčko distrikta BiH.

Nastavnici koji su ostvarili uspjehe su Nijad Salihović, Almira Omerović (Deveta osnovna škola eTwinning škole, Mehatronika u službi zdravlja), Mateo Banović i Nadina Omazić (Deseta osnovna škola „Sigurnost od požara u uvjetima pandemije COVID-19“), Rade Rašeta (Prva osnovna škola „Mali pomoćnik“) te Azra Salihović (Petnaesta osnovna škola „Čep za hendikep“).



# Gradonačelnik čestitao Mejdiju Sulejmaniju na osvojenom prvom mjestu na Solo gitarist festival

Gradonačelnik Brčko distrikta Bosne i Hercegovine Esed Kadrić u Gradskoj vijećnici primio je istaknutog gitaristu Mejdija Sulejmanija povodom osvojenog prvog mjesta na međunarodnom Solo gitarist festival za autorsko djelo pod nazivom „1984“.

Gradonačelnik je čestitao Sulejmaniju na ostvarenom rezultatu i naglasio da je ovim potvrdio da se radi o jednom od trenutno najznačajnijih i najboljih gitarista u BiH i regiji.

„Mi vrednujemo svakog vrijednog i mladog čovjeka, posebno one koji promovišu Distrikt. Nadamo se da će u vremenu u kojem je pred nama doći do izražaja još više

njegova sposobnost kreiranja vlastitih umjetničkih djela i nastaviti promovisati Distrikt i BiH“, kazao je Kadrić.

Sulejmani je naglasio da će se i dalje truditi kako bi sa svojim postupcima i uspjesima osvjetlao obraz Brčkog, ali i porodice i svih onih koji ga cijene i poštuju.

„Meni je zadovoljstvo što mogu svoj grad predstaviti u najboljem svjetlu i ovo nije samo moj uspjeh, nego ovo je uspjeh svih nas i našeg grada na koji sam ponosan“, kazao je Sulejmani.

Mejdi je trenutno jedan od najaktivnijih gitarista u BiH koji saraduje s mnogim poznatim bh. zvijezdama.





## Potpisivanjem Sporazuma nastavljena suradnja Distrikta i UNDP-a na polju energetske učinkovitosti



Gradonačelnik Brčko distrikta Bosne i Hercegovine Esed Kadrić u Gradskoj vijećnici potpisao je Sporazum o udruživanju sredstava s rezidentnom predstavnicom UNDP-a Stelianom Neder u iznosu od 1.200.000,00 KM s ciljem utopljanja javnih objekata na području Distrikta.

Nakon potpisivanja, Gradonačelnik je kazao kako se nada da će ova suradnja biti nastavljena s ciljem otvaranja novih suradnji i angažmana koji bi bili od koristi za Distrikt.

„Svjesni kako su klimatske promjene jedan od najvećih izazova u ovom trenutku s kojim se čitav svijet suočava, mi želimo dati svoj doprinos kako bismo smanjili potrebu za angažiranjem električne energije koja dolazi iz resursa koji nisu iz obnovljivih izvora. Distrikt je u međuvremenu usvojio i Akcijski plan održivog upravljanja energijom i prilagođavanja klimatskim promjenama i to je bio važan korak koji smo napravili u ovoj godini. Odnosi se na sektor okoliša i energije tako što je to trasiralo put Distrikta za postizanje zelenog i održivog razvoja ove zajednice“, kazao je Kadrić.

Rezidentna predstavница UNDP Steliana Neder kazala je kako joj je drago što vidi da radovi na

javnim zgradama zdravstvenog sektora napreduju koji bi trebali biti okončani do kraja ove godine.

„Potpisivanjem sporazuma omogućili smo nastavak naše suradnje na polju utopljanja javnih objekata. S obzirom na financijske troškove i emisije nastale korištenjem neobnovljivih izvora energije, provedba mjera energetske učinkovitosti u Brčko distriktu BiH je više nego nužna za zeleni oporavak i održivi razvoj samog Distrikta. Vrlo je značajan posao koji radimo u ovoj zemlji na smanjenju negativnog utjecaja klimatskih promjena i radujemo se prilici da našu suradnju učinimo još svrsihodnijom u idućim godinama i razdoblju koji je pred nama“, kazala je Neder.

Cilj pokretanja energetske obnove u Brčko distriktu BiH je uspostavljanje održivog financijskog mehanizma u kojem bi se uštede ostvarene nakon obnove zgrada vraćale za udjel u obnovi drugih javnih zgrada.

Prije potpisivanja Sporazuma gradonačelnik je zajedno sa svojim suradnicima i predstavnicima UNDP-a posjetio radove na utopljanju zgrada zdravstvenog sektora.

# Svečano otvorena školska fiskulturna sala u Omerbegovači

Gradonačelnik Brčko distrikta Bosne i Hercegovine Esed Kadrić svečano je otvorio školsku fiskulturnu salu u područnoj Drugoj osnovnoj školi u naselju Omerbegovača.

U izgradnji školske fiskulturne sale gradonačelnik je kazao da je uloženo oko pola miliona konvertibilnih maraka i da se radi o objektu koji će zadovoljiti potrebe učenika, ali i mještana.


„U kratkom vremenu došlo je do realizacije projekta izgradnje školske fiskulturne dvorane u Omerbegovači i to predstavlja kontinuitet rada Vlade na izgradnji fiskulturnih školskih dvorana. Ovim činom Vlada je skoro postigla svoj cilj da u svim područnim školama gdje je iskazana potreba, naravno i onim koje su matične, imamo izgrađene dvorane. U ovom trenutku imamo 25 fiskulturnih dvorana na području Distrikta što je uistinu jedan impozantan broj. Ostalo je još da u potpunosti realizujemo već započetu izgradnju dvorane u Bukviku, Brodu i Potočarima i dvoranu u JU Poljoprivrednoj i medicinskoj školi, za koju smo u posljednjih mjesec dana izdvojili 1.000.000,00 KM. Nastavljamo raditi i u narednoj godini i intenzivirat ćemo aktivnosti na izgradnji preostale četiri školske fiskulturne dvorane“, istakao je Kadrić.

Svečano školsku fiskulturnu salu otvorio je i šef Odjeljenja za obrazovanje Vlade Brčko distrikta BiH Zoran Bulatović.

„Veliko mi je zadovoljstvo što u prvoj godini mandata imam priliku da otvorimo dvije fiskulturne sale za potrebe područnih škola i naših učenika. U ovoj godini počeli smo s radom i na novom objektu fiskulturne sale u područnoj školi u Potočarima. Maksimalno se trudimo da radimo sve ono što je u interesu naših učenika i što može da poboljša izvođenje nastave s ciljem pravilnog razvijanja učenika kroz aktivnosti“, kazao je Bulatović.

Pomoćnica direktora Druge osnovne škole Maida Gubaljević nakon svečanog otvorenja fiskulturne školske sale kazala je da je to veliki značaj za učenike i nastavnike.

„Izgradnja sale je veliki značaj za naše učenike jer nastava se u proteklim godinama odvijala u učionicama ili na vanjskim terenima. Svi smo ponosni, a posebno naši učenici“, kazala je Gubaljević.



# Zvaničnici Distrikta pozivaju sve one koji daju negativne izjave da ne koriste Distrikt za bilo kakvo političko sukobljavanje u BiH



Povodom sve češćeg spominjanja Brčko distrikta BiH u medijima kroz izjave visokih političkih zvaničnika iz BiH te pojedinih predstavnika međunarodne zajednice kao sudbonosnog mjesta za opstojnost Bosne i Hercegovine, mi dolje potpisani izabrani predstavnici vlasti u Brčko distriktu BiH iz reda sva tri konstitutivna naroda podsjećamo sve dobronamjerne i one druge da je Brčko distrikt BiH jedina istinska multietnička zajednica u BiH u kojoj su potpuno i u svim segmentima apsolutno ravnopravni Bošnjaci, Hrvati i Srbi, da ovdje živimo i radimo jedni s drugima, a ne jedni pored drugih.

Potpuno je jasno da je svim stanovnicima Brčko distrikta BiH od opasnih izjava mnogo potrebna stabilnost, ekonomski razvoj i realizacija započetih projekata kao što su revitalizacija Luke Brčko, trasiranje autoputa i plinovoda, izgradnja Centra za zbrinjavanje otpada, izgradnja kružnog prstena za vodosnabdijevanje jednom riječju projekata koji će u ovom vijeku opredijeliti pravac razvoja distrikta Brčko.

Mi smo odlučni u namjeri da nastavimo razvijati unutrašnji konsenzus o ravnomjernom i sveukupnom

razvoju Brčko distrikta BiH, kako bismo privlačenjem stranih i domaćih investicija osigurali što više radnih mjesta, viši životni standard, kvalitetniju zdravstvenu zaštitu i povećan obim socijalne brige za ugrožene kategorije stanovnika.

Pred nama je godina puna izazova u kojoj ćemo se fokusirati na jačanje vladavine prava, demokratskih institucija u Brčko distriktu BiH, borbu protiv korupcije, nastavak reformskih procesa, partnerski odnos s međunarodnim institucijama, posebno Uredom supervizora za Brčko distrikt BiH.

Izjave o Brčkom kao opasnom području potpuno su suprotne našoj svakodnevnici. Mi sasvim normalno živimo o čemu mogu posvjedočiti svi koji ovih dana, a posebno tokom večeri posjećuju naš grad.

Zbog zajedničke budućnosti pozivamo sve koji daju zapaljive izjave da ne koriste Brčko distrikt BiH za bilo kakvo političko sukobljavanje u BiH.

Takve nepromišljene i neodmjerene izjave otežavaju napore lokalne vlasti za nastavak aktivnosti na razvoju ove specifične jedinice lokalne samouprave kao izvanrednog primjera uspješnog poslijeratnog suživota.



# Колегијум Владе разматрао Информацију Полиције Брчко дистрикта БиХ

Колегијум Владе Брчко дистрикта Босне и Херцеговине разматрао је Информацију Полиције Брчко дистрикта Босне и Херцеговине о догађајима са елементима кривичних дјела или прекршаја забиљежених на подручју Брчко дистрикта Босне и Херцеговине у временском периоду 2018–2021. година, који су идентификовани као појава навијачког хулиганизма са манифестацијама говора мржње, физичког насиља те оштећења јавне и приватне имовине.

Узимајући у обзир одређење Владе Брчко дистрикта БиХ да кроз властити Акциони план јача кохезију у заједници као одговор на инциденте мотивисане предрасудама и мржњом, те чињеницу да Брчко дистрикт БиХ представља локалну заједницу посвећену јачању позитивних вриједности са изграђеним механизмима реакције за спречавање и осуђивање наведених инцидената, Влада Брчко дистрикта БиХ осуђује појаву навијачког хулиганизма и све његове манифестационе облике на подручју Дистрикта.

Подстакнута чињеницом да криминални миље обухвата и малољетничку популацију, у облику екстремних физичких обрачуна и сукоба навијачких група, паљевина аутомобила, исписивања графита и на други начин исказивања садржаја непримјерених за мултиетничку заједницу, уништавање

саобраћајних знакова и табли са натписима мјеста, Влада Брчко дистрикта БиХ даје пуну подршку органима и институцијама Брчко дистрикта БиХ с циљем предузимања свих мјера и радњи у области репресије у складу са надлежностима, те примјереног кажњавања починилаца, како би се прекинуо ланац активности са елементима кривичног дјела која представљају озбиљну пријетњу безбједности и резултирају оштећењем приватне и јавне имовине у Брчко дистрикту БиХ.

Влада Брчко дистрикта БиХ, такође, истиче значај потребе хитног и ширег друштвеног и институционалног напора ове заједнице да се предузму активности превенције усмјерене ка навијачкој популацији коју чине млади људи, кроз теме и пројекте у којима ће доћи до њиховог међусобног приближавања и препознавања заједничких интереса, а отклона од поларизације и сукоба, што треба да буде циљ свих у Брчко дистрикту БиХ.

Влада Брчко дистрикта БиХ указује да примјерен одговор и осуда оваквих инцидената могу бити ефикасни само уз укључивање шире друштвене заједнице и јачање свијести о негативним контекстима инцидената, као и отпорности заједнице према намјерама и активностима које нарушавају темељне вриједности ове локалне заједнице.

# Potpisan Memorandum o saradnji između Vlade, Skupštine i Privredne komore Distrikta

U Gradskoj vijećnici potpisan je Memorandum o saradnji između Vlade Brčko distrikta Bosne i Hercegovine, Skupštine Brčko distrikta BiH i Privredne komore Brčko distrikta BiH, kojim su regulisana međusobna prava i obaveze, strateška uloga i pravci zajedničkog djelovanja partnera u oblasti stvaranja konkurentnije privrede Brčko distrikta BiH. Sporazum su potpisali gradonačelnik Distrikta Esed Kadrić, predsjednik Skupštine Siniša Milić i predsjednik Privredne komore Dragan Đukić.

Kako je kazao gradonačelnik Kadrić, ovim memorandumom je formalizovana saradnja Vlade i Skupštine Brčko distrikta sa Privrednom komorom, te predstavlja potvrdu konkretnog i zdravog partnerskog odnosa poslovne zajednice i institucija **D i s t r i k t a**. “Mi smo izanalizirali sve mjere podrške koje su predviđene zakonima Brčko distrikta, sagledavali smo da dođe do kvalitativnih popravaka određenih zakonskih rješenja koja imamo, posebno privredne i podsticajne politike, kako bismo zadržali atraktivnosti ulaganja u Brčko distrikt. Vlada Brčko distrikta predano radi na tome da omogući Privrednoj komori da, putem svojih organa, može animirati ulagače, bilo da se radi o domaćim ili ulagačima koji nisu iz naše lokalne zajednice, kako bismo mogli dodatno poboljšati privredno ulaganje kao i podizanje standarda života i zapošljavanja na području Distrikta”, rekao je Kadrić. Predsjednik Skupštine Brčko distrikta BiH Siniša Milić izrazio je zadovoljstvo potpisivanjem

memoranduma, čime se naglašava unapređenje dijaloga javnih vlasti i privrede Brčko distrikta. “Imamo zajednički cilj a to je unapređenje poslovnog ambijenta, zadržavanje i povećanje radnih mjesta na prostoru Distrikta Brčko i kroz ovaj memorandum smo potvrdili da smo partneri u ovom procesu. Kada je u pitanju Skupština, to znači da ćemo sve propise donositi u komunikaciji, prethodno pripremajući te akte zajedno sa Privrednom komorom”, kazao je Milić. Pored potpisivanja Memoranduma, Privredna komora je predstavila projekat na kojem radi, pod nazivom “Help Desk for business entities”, u okviru programa “EU 4 Business Recovery”, a kojeg finansiraju Evropska unija i Vlada Savezne **R e p u b l i k e N j e m a č k e**. “Ovaj projekat se realizuje preko Njemačke organizacije za međunarodnu saradnju (GIZ), Međunarodne organizacije rada (ILO) i Razvojnog programa Ujedinjenih nacija (UNDP) i mi smo ga dobili preko GIZ-a kako bismo ga implementirali na području Brčko distrikta, a odnosi se na pružanje pomoći privrednicima da savladaju poteškoće prouzrokovane pandemijom Korona virusa. Moram da naglasim da smo zadovoljni sa današnjim sastankom kao i sa dosadašnjom saradnjom koju imamo sa predstavnicima institucija Brčko distrikta i trebamo težiti da poboljšamo poslovni ambijent i da stvaramo uslove za privređivanje i stvaranje novih radnih mjesta“, istakao je predsjednik Privredne komore Dragan Đukić.





Esed Kadrić, gradonačelnik Brčko distrikta Bosne i Hercegovine, primio je članove Organizacionog odbora 19. Međunarodnog Bajramskog turnira u malom fudbalu koji počinje u nedjelju 26. decembra 2021.godine i trajat će do 5. januara 2022.godine.

Kako su kazali prisutni članovi, na turniru će učestvovati sve kategorije, od pjetlića do veterana, a ono što je novina ovogodišnjeg turnira jeste organizovanje takmičenja u konkurenciji djevojaka, pod nazivom Memorijal „Dževad Bekić Džeko”. Podsjetili su da je Dževad Bekić Džeko bio najistaknuti trener i selektor ženske reprezentacije Bosne i Hercegovine, kao i predsjednik Organizacionog odbora 1. Međunarodnog Bajramskog turnira koji se održao u 2004. godini, te da će se na taj način dati mali doprinos za njegovu veliku posvećenost ovom sportu. Također su obezbijeđene novčane nagrade za najuspješnije ekipe, kao i pehari, zahvalnice i nagrade za najbolje pojedince. Gradonačelnik Kadrić kazao je da će dati svoj doprinos u realizaciji ovog turnira, jer se radi o jednom od najznačajnijih sportskih događaja u Brčko distriktu kojim se različite generacije, posebno učenici osnovnih i srednjih škola, podstiču na bavljenje sportom.

## **Gradonačelnik upriličio prijem za članove Organizacionog odbora 19. Međunarodnog Bajramskog turnira**

## Уручени новогодишњи пакетићи дјечи на Одјељењу за педијатрију

У име Кабинета градоначелника Брчко дистрикта Босне и Херцеговине на Одјељењу за педијатрију ЈЗУ Здравствени центар Брчко главни координатор Владе Жељко Антић уручио је пакетиће дјечи која се тренутно налазе на лијечењу.

Том приликом дјечи је зажелио брз опоравак и да се што прије врате својим кућама.

Запосленици брчанске Педијатрије захвалили су се Кабинету градоначелника и главном координатору на донираним пакетићима што ће, како су нагласили, засигурно поклати обрадовати дјецу.

## Градоначелник Есед Кадрић уприличио пријем за ЖОК „Bimal-Jedinstvo“ Брчко

Есед Кадрић, градоначелник Брчко дистрикта Босне и Херцеговине, заједно са замјеником градоначелника Антом Димићем и главним координатором Жељком Антићем уприличио је пријем за управу и чланове Женског одбојкашког клуба „Bimal-Jedinstvo“ Брчко, поводом освајања првог мјеста на крају јесенјег првенства БиХ, њиховог учешћа у Европској Лиги шампиона и CEV купу, као и других досадашњих остварених резултата.

Градоначелник Кадрић упutio је честитке клубу на завидним резултатима те је казао да градске власти стоје чврсто иза овог клуба и њиховог успјеха, у смислу материјалне и финансијске подршке. „Недавно смо осигурали и простор за потребе клуба, те смо нашли рјешење које ће одагнати одређене проблеме које је ЖОК имао за учешће у Европској лиги шампиона, упркос томе што смо тренутно у транзитном периоду

primjene zakona koji se odnosi na finansiranje nevladinog sektora i sportskih klubova. Također smo ekskluzivno najavili da Vlada konačno kreće u proces izrade projektne dokumentacije za izgradnju multifunkcionalne gradske dvorane koja će se raditi za potrebe naših uspješnih klubova, među kojima je i ženski odbojkaški klub“, naglasio je Kadrić.

Esad Omerhodžić, predsjednik ŽOK, zahvalio se na prijemu i pruženoj podršci Vlade, a naročito na obezbjeđenju kancelarijskog prostora za rad ovog kluba. „Sve što želimo od Vlade jeste podrška, a ŽOK će njihovo povjerenje sigurno opravdati svojim radom i rezultatima“, kazao je Omerhodžić.

Zahvale je uputila i Žana Dragutinović, kapiten ŽOK, te je naglasila da se radi o klubu koji je vrijedan pažnje i da prikazuju Brčko distrikt BiH u najboljem svjetlu, kao pravi ambasadori grada.



## U Omladinskom centru održan „Dijalog s mladima“

S ciljem boljeg razumijevanja položaja mladih i donošenja kvalitetnog dokumenta Nacrta strategije za mlade, Odjel za stručne i administrativne poslove Vlade Brčko distrikta Bosne i Hercegovine, Vijeće/Savjet mladih Brčko distrikta BiH i Institut za razvoj mladih KULT uz potporu Međunarodne organizacije za migracije BiH (IOM) organizirali su u Omladinskom centru „Dijalog s mladima“.

Predstojnik Odjela za stručne i administrativne poslove Nedim Hamzabegović kazao je da je cilj organiziranog dijaloga bio da se evidentiraju mišljenja i prijedlozi kako bi se što kvalitetnije donijela Strategija za mlade.

„Ovo je dobar put da mladi ukažu vlastima na ono što je njima potrebno i način kako da se te njihove potrebe ostvare koje su navedene u pet tema kao što su zapošljavanje, sigurnost, socijalni aspekt i sl.“, kazao je Hamzabegović.

Predsjednik radne skupine i predstavnik Odjela za stručne i administrativne poslove Srđan Kisić kazao je da je nakon usvajanja Strategije za mlade za očekivati da se poboljša položaj i status mladih na području Distrikta.

„U dijalogu bile su uključene mnoge interesne skupine, nevladine organizacije specijalizirane za

određene oblasti, zatim različita skupštinska povjerenstva koja tretiraju problematiku mladih kao i neformalne skupine građana. Strategija za mlade bit će prva strategija koja će biti predložena i nadam se usvojena. To je logičan slijed događaja s obzirom da je nedavno usvojena i Strategija razvoja Distrikta za razdoblje 2021. 2027. godina“, kazao je Kisić.

Dijalogu s mladima nazočila je i Katarina Vučković iz Instituta za razvoj mladih KULT i voditeljica odjela za rad s mladima koja je naglasila da je Strategija za mlade obveza svih razina vlasti u BiH kao i Distrikta.

„Ona bi trebala da sustavno odgovori na pitanja potrebe i probleme mladih Distrikta. Cilj nam je dobiti što veći broj prijedloga od strane mladih ljudi prema vlastima, na koji način rješavati probleme s kojima se oni susreću i koje su njihove potrebe. Mi smo uvidjeli da se problemi mladih ljudi u Distriktu ne razlikuju od drugih mladih u BiH“, kazala je Vučković.

Dijalogu s mladima nazočio je i predsjednik Vijeća/Savjeta mladih Brčko distrikta BiH Vladimir Kanostrevac koji je kazao da su se potrudili da okupe što veći broj kvalitetnih mladih ljudi i organizacija kako bi dobili, kako je naglasio, što kvalitetnije ideje koje bi iznjedrile dobru Strategiju za mlade.

## Vlada aktivno radi na privlačenju poslovnih inicijativa na području Distrikta



Gradonačelnik Brčko distrikta BiH Esed Kadrić potpisao je s predstavnicima kompanije „Heez Aluminijum“ Tuzla ugovor na osnovu specijalne pogodbe o raspolaganju javnom imovinom, zasnovan na poslovnoj inicijativi spomenute kompanije. Ovim ugovorom se kompanija obavezala na investiranje u izgradnju i stavljanje u funkciju proizvodne pogone u vrijednosti od 20 miliona KM u periodu od pet godina, kao i da će na izgrađenim proizvodnim površinama

zaposliti 60 radnika.

Potpisivanjem drugog ugovora o specijalnoj pogodbi, Vlada Distrikta nastavlja intenzivno realizovanje poslovnih inicijativa renomiranih kompanija jer, kao što je već poznato, u julu mjesecu ove godine potpisan je ugovor na osnovu specijalne pogodbe o uspostavi prve slobodne poslovne zone na području Distrikta s kompanijom Studen Holding.

## Анкета о радној снази на подручју Дистрикта

Агенција за статистику Босне и Херцеговине од 1. 1. 2022. године у складу са Законом о статистици БиХ на територији Брчко дистрикта Босне и Херцеговине наставиће са спровођењем континуиране Анкете о радној снази у БиХ.

Анкетирање се врши током читаве године, а спроводе га анкетари акредитовани од стране званичних статистичких институција у БиХ. Према Закону о статистици БиХ и Закона о заштити личних података, статистичке институције БиХ гарантују пуну повјерљивост података.



U Gradskoj vijećnici danas je održana novogodišnja press konferencija na kojoj su se obratili gradonačelnik Brčko distrikta Bosne i Hercegovine Esed Kadrić i predsjednik Skupštine Distrikta Siniša Milić, osvrnuvši se na aktivnosti novoformirane vlasti u toku 2021. godine.

U svom uvodnom govoru, gradonačelnik Kadrić podsjetio je da je novoimenovana Vlada Distrikta, koja je s radom započela 19. januara ove godine, usvojila dva budžeta i dva rebalansa budžeta primjenjujući novi Zakon o budžetu uz sve prateće podzakonske akte, te je naglasio bitne dokumente koji su usvojeni poput Strategije razvoja Brčko distrikta BiH, kao i projekte koji se privode kraju Kupalište u Brezovom Polju, rekonstrukcija SMS Blatuša, premještanje gradske fontane „Ribica“ i slično.

„Pokrenuli smo realizaciju projekata u našem gradu, osluškujući potrebe naših građana, u želji da Brčko bude lokalna zajednica za primjer, kao što su uljepšavanje užeg centra grada i rekonstrukcija objekata u pješačkoj zoni, utopljanje zgrada Doma zdravlja i Bolnice, trasiranje autoputa kroz teritoriju Brčko distrikta BiH, koji će činiti buduću dionicu autoputa Beograd Sarajevo...“ između ostalog je istakao Kadrić.

# Održana zajednička novogodišnja press konferencija Vlade i Skupštine



On je podsjetio da je Vlada započela s intenzivnom realizacijom poslovnih inicijativa renomiranih kompanija, te da se od tih inicijativa očekuju benefiti isključivo za građane Distrikta i stvaranje pravnog ambijenta koji će u budućem periodu privući i povećati dolazak investitora na područje Distrikta.

„Uz podršku Svjetske banke, pred nama su četiri važna projekta: izgradnja centra za upravljanje čvrstim otpadom, sanacija postojeće deponije i njeno uređenje, uređenje obale rijeke Save, regulacija korita rijeka Brke i Blizne“, kazao je gradonačelnik, te spomenuo i dolazak velikog broja ambasadora, članova međunarodnih organizacija i visokopozicioniranih državnih službenika.

Predsjednik Skupštine Distrikta Siniša Milić opisao je godinu koja je na izmaku kao zadovoljavajuću, uzimajući u obzir okolnosti u kojima je djelovala i Vlada i Skupština, prije svega misleći na uslove uzrokovane pandemijom.

„Mislim da smo pokazali visok stepen odgovornosti, budući da je Vlada Brčko distrikta BiH formirana najranije od svih izvršnih vlasti na prostoru Bosne i Hercegovine, i mislim da je to pokazalo i odredilo pravac djelovanja ove vladajuće većine, dakle, postignuta je saglasnost o izboru gradonačelnika, predsjednika Skupštine i krenulo se u realizaciju značajnih projekata“, izjavio je Milić, te naglasio i značaj formiranja Ureda za prevenciju korupcije, naročito u smislu zaštite onih koji prijavljuju korupciju.

„U svakom slučaju, podijelit ću optimizam za 2022. godinu, u nadi da će biti bolja nego ova koja je na izmaku, kako u pogledu epidemiološke situacije, tako i u smislu stvaranja uslova za ekonomski razvoj Brčko distrikta BiH, što znači da će mladi tražiti svoju perspektivu i graditi na prostoru Brčko, i da će oni koji su otišli iz ovog grada, naći motive da se vrate i da zajednički kreiramo i provodimo politike“, za kraj je dodao predsjednik Skupštine Siniša Milić.



## Održan tradicionalni novogodišnji prijem za predstavnike medija

U organizaciji Vlade i Skupštine Brčko distrikta Bosne i Hercegovine održan je tradicionalni novogodišnji prijem za predstavnike medija koji rade i djeluju na području Distrikta. Prijem su po prvi put upriličili zajedno gradonačelnik Brčko distrikta Bosne i Hercegovine Esed Kadrić i predsjednik Skupštine Siniša Milić.

Gradonačelnik Kadrić iskazao je zadovoljstvo saradnjom vlade i medija u vidu kvalitetnog i objektivnog izvještavanja brčanske javnosti te je istakao da će se dalje raditi na jačanju veze i povjerenja između institucija i medija.

„Imamo prilično izazovnu godinu iza sebe, u kojoj su Vlada i Skupština uspjele sve izazove prevazići. Ostvaren je značajan napredak u vidu realizacije konkretnih projekata i aktivnosti koji se mogu prepoznati u našoj zajednici. Ovo je bila dobra prilika da potvrdimo da smo imali vrlo dobru i korektnu saradnju, da se autentično prenesu sve važne informacije koje su neophodne da se spoznaju u javnosti i da novinari u Brčkom imaju naše puno poštovanje“, kazao je Kadrić, te su prisutnim predstavnicima medija uručeni simbolični pokloni.



# Brčaci Novu 2022. godinu dočekali s Ninom Badrić

U okviru obilježavanja dočeka Nove 2022. godine na brčanskom Trgu mladih nastupila je Nina Badrić. Tim povodom u Gradskoj vijećnici održana je i konferencija za medije, na kojoj su se novinarima obratili gradonačelnik Brčko distrikta Bosne i Hercegovine Esed Kadrić i pjevačica Nina Badrić.

Gradonačelnik Kadrić pozvao je sve građane, kako iz Brčkog, tako i iz obližnjih mjesta, da dočekaju Novu godinu u našem gradu, u dobroj atmosferi.

„Vjerujem da će mnogi iz Republike Hrvatske, Srbije, iz gradova u okruženju u Bosni i Hercegovini biti gosti u Brčkom i osjećati se ugodno uživajući u ovom koncertu, te da će ponijeti lijepa sjećanja“, dodao je Kadrić.

„Zahvalila bih se gradonačelniku što mi je uputio prvi poziv da dođem u Brčko, na koji sam se sa zadovoljstvom odazvala i presretna sam što je ovo jedan od rijetkih događaja koji nije otkazan i jako sam sretna“, kazala je Nina Badrić.

BRČKO DISTRIKT  
BOSNE I HERCEGOVINE  
V L A D A



БРЧКО ДИСТРИКТ  
БОСНЕ И ХЕРЦЕГОВИНЕ  
В Л А Д А

**ИНФО**

Kancelarija gradonaèelnika, Sekretarijat Vlade Brèko distrikta BiH,  
Sektor za informisanje Vlade Brèko distrikta BiH  
Bulevar mira 1, 76100 Brèko distrikt BiH

[vlada.bdcentral.net](http://vlada.bdcentral.net)